

LA CARTA DEL APOSTOL SAN PABLO A LOS ROMANOS

¹ Wejr Pabluqui ančhucaquin tii cartal cji-ržcuča. Jesucristuž mantitacama okiñ žoñtča. Yooz Ejpqui wejr kjawžcu apóstol puestuquin utchiča, liwriiñi Yooz taku parlajo.

² Tuquitanpacha Yoozqui tsjii liwriiñi žoñi cuchanžquiz compromitchiča. Jalla nii compromittauqui Yooz cuntiquiztan chiiñi profetanacuqui mazinchiča zuma Yooz tawk libruquiz.

³ Nii liwriiñi žoñiqui Jesucristo Jiliriča. Yooz Majchča niiqui. Jesucristuqui žoñi cjicanaqui Davidž majch maatinacquiztan tjonñitača.

⁴ Nižaza Jesucristuqui ticziquiztan jacatatchiča; nižaza zuma Yooz Espirituchizza. Jalla nii kjanapacha tjeeža, niiča walja azziz Yooz Majchqui, nii. Jesucristo Yooz Majchča učhum Jiliriqui.

⁵ Jesucristuž cjen wejrqui zuma Yooz kamaña tanzinča. Nižaza Jesucristuž cjen Yooz Ejpqui wejr apóstol puestuquiz utchiča, tjapa wajtchiz žoñinaca Jesucristužquin kuzziz cjejajo, nižaza nižquiz cazajo. Jalla nuž apóstol kamañquiz kamcan, Jesucristužtajapa langznuča.

⁶ Ančhuc zakaz Jesucristužquiz kuzziz cjissinčhucča. Yooz Epiž ančhuca kuzquiz kjawžtan Jesucristuž partiquiz cjissinčhucča.

⁷ Wejrqui tjapa ančhucaquin cjiiržcuča, Roma wajtquin žejlñi žoñinacħucħa. Yooz k'ayi žoñinacaž cjen, Yoozqui ančhucaquiz kjawziča, Yooz zuma kamañchiz cjeyajo. Učhum Yooz Ejpmi, nižaza Jesucristo Jilirimi ančhucaquiz zumaj yanapt'ila; nižaza cuntintu kuzziz cjiskatla.

PABLO ROMA WAJTQUIN TJONZ PECCHA

⁸ Jaziqui ančhucaž zuma kamtiquiztan Yooz Ejpžquin ancha gracias cjican chiyuča. Tjapa wajtchiz žoñinacaqui ančhuc puntu chiiča, ančhucqui ancha Jesucristužquin kuzzizza, nii. Jesucristuž cjen Yoozquin gracias cjican chiyuča.

⁹ Wejrqui tjapa kuz Yooz sirwuča, Yooz Majch liwriiñi puntu parlican. Jaziqui Yooz zizza, oracionžtan ančhucaquiz tirapan yanapuča, nii.

¹⁰ Nižaza Yoozquin mayizuča. Yooz munan, ultimu ančhucaquin jaknužquiztanami tjonzquiz atučhani. Ažka ančhucaquin tjonzquiz pecatuča.

¹¹ Ančhucatan ancha zalz pecuča, Yooz kamañquiz ančhucaquiz tsjan zuma kami yanapzjapa, nižaza Yooz tjup kuzzizpan cjiñi yanapzjapa.

¹² Ančhucmi wejrmi Jesucristužquinkaz kuzzizčhumča. Jalla nižtiquiztan zalžcu porapat chiižinascu, Yoozquin juc'ant kuzziz cjesača učhumqui.

¹³ Jilanaca, cullaquinaca, ančhucaquiz zizkatz pecuča, kjaž wiltami wejrqui ančhucaquin tjonz pecatuča. Pero tii orcama ana atchinča. Ančhucaquin tjonz pecatuča, Rom wajtquiz zakaz Yooztajapa obranaca payi. Rom wajtquizimi, nižaza yekja watjanacquizimi

Jesucristužtajapa langz pecučha, žoñinaca nižquin kuzziz cjeajajo.

¹⁴ Wejrqui liwriiñi Jesucristuž puntu parlistanča, k'ar žoñinacžquizimi campuquiz žejlñi žoñinacžquizimi, zizñi žoñinacžquizimi, ana zizñi žoñinacžquizimi. Jalla tjapa žoñinacžquizimi liwriiñi Jesucristuž puntu parlistanča.

¹⁵ Jalla nižtiquiztan wejrqui ančhucaquiz zakaz nii puntu parliz anchal pecučha.

ANCHA AZZIZZA LIWRIIÑI TAKUQUI

¹⁶ Jakziltat liwriiñi Yooz taku catokačhaj niiqui, liwriita cjequiča. Tuquiqui judío žoñinacžquiz nii liwriiz puntu parlitatača. Nekztan yekja wajtchiz žoñinacžquiz parlitazakaztača. Jakziltat nii liwriiz puntu catokačhaja, jalla niiqui liwriitaž cjequiča. Nižta azzizza liwriiñi Yooz takuqui. Jalla nižtiquiztan nii Yooz taku parlizjapa anal azučha; nii ancha zuma taku parlizjapa ancha jutzaznuča.

¹⁷ Liwriiñi takuqui tuž cjiča; Yoozqui ancha zumača; nižaza žoñinacžquiz nižta zuma nižaza ana ujchiz cjiskatasacha. Jalla nuž cjiča nii liwriiñi Yooz takuqui. Jaknužt žoñinaca Yooz yujcquiz ana ujchiz, nižaza zuma cječhaja, jalla nii zizkatučha, nii liwriiñi taku chiican. Jesucristužquiz kuzziz cjen, jalla nii alajakaz Yooz yujcquiz ana ujchiz, nižaza zuma kuzziz cjesacha. Cjijrta Yooz takuqui tuž cjiča: “Jakziltat Yoozquin kuzziz cječhaja, jalla niičha Yooz yujcquiz ana ujchizqui, nižaza zuma kuzzizqui. Nekztan Yooztan wiñaya kamaquiča”.

YOOZ JAYTIZCU ZOÑINACAQUI UJPAN PAACHA

18 Arajpachquiztan Yooz casticuqui tjonča tjapa ana Yooz kuzcama kamañinacž quintra, nižaza anawali paañinacž quintra. Jalla nii anazum kamañichiz žoñinacaqui anawali paaznacapan pecča, Yooz zuma kamaña anaž importičha. Nekztan Yooz kuzcama ana kamča. Yooz puntu werara zizawc cjen, atajča.

19 Pero ninacž kuzquiz Yooz puntu zizasacha. Yoozqui žoñinacžquiz kjanapacha tjeeziča, niž puntu.

20 Ana Yooz cheržcumi tii mundo paatiquiztanpacha Yooz puntu zizta cjesacha. Niiž paatanaca cheržcu, tjapa žoñinacaqui Yooz puntu zizasacha, Yoozqui wiñaya azzizza, nižaza werar Yoozpankazza, tii mundo paachi Yoozqui. Jalla nii kjana zizta cjesacha. Jalla nižtiquiztan Yooz kuzcama ana kamcanaqui anazuma kamañichiz žoñinacaqui ana razunchizza.

21 Žoñinacaqui Yooz puntu persun kuznacquiz zizza. Jalla nuž zizcumi, Yooz ana rispitcha, nižaza ana čjulquiztanami “Gracias, wejť Yooz” cjican chiiča. Nekztan žoñinacaqui ina kaz pinsitanacchiz cjissiča. Nižaza ninacž chojru kuzziz cjen ana wali zumchiquiztakaz kamča.

22 Žoñinacaqui “Wejrnacča ziziñtqui” cjicanami, zumzužtakaz cjissiča.

23 Ancha zumapankazza Yoozqui. Pero žoñinacaqui nii wiñaya žejtñi Yoozquiz rispitz jaytichiča. Nekztan žoñinacaqui žoñiž paata yoozquizkaz rispitiñi cjissiča. Nii žoñiž paata yooznacaqui ticžñi curpuchiz žoñinacž irata paatača, nižaza wežlanacž irata paatača, nižaza pajkpic kjojchchiz animalanacž irata

paatača, nižaza zkoranacž irata paatača. Jalla nižta paatanacquiz rispitcha.

²⁴ Jalla nižtiquiztan Yooz Ejpqui ninacžquiz jaytichiča. Nekztan ninacž anazuma pecni kuzcama čjul ujmi paañiča. Zoñinacpora azzucanaca paachiča.

²⁵ Ninacaqui Yooz puntuquiztan werar razunanaca criichi ecchiča. Nekztan toscar razunanaca criichiča. Jalla nekztan ninacaqui Yoozquin ana rispitchiča. Yooziž paata obranacquizkaz rispitchiča, nižaza sirwichiča. Pero Yoozqui tjappacha paachiča. Jalla nii tjapa paañi Yoozqui wiñaya honorchizza. Jalla nužoj cjila. Amén.

²⁶ Jalla nižta anawali kuzziz cjen Yoozqui ninaca jaytichiča, ninacaž anazum kuzcama azzucanaca paajo. Jalla nuž azzucanaca paacan maatakanacaqui porapat želassiča, jaknužt lucutiñi želas, jalla nižta.

²⁷ Luctakanacaqui nižaza porapat ana wali želassiča, jaknužt lucutiñi želas, jalla nižta. Ninacpora ancha peccu, azzuca ujnaca paachiča. Ancha akñi ujnacquiz tjojtsiča. Jalla nižtiquiztan ninacž persun curpuquizpacha casticu sufriča, nii ana wali paatiquiztan. Nižaza nižta sufris waquiziča ninacaqui.

²⁸ Werar Yooz zizzucatača, pero ninacaqui Yooz ana pajz pecatča. Jalla nižtiquiztan Yoozqui ninaca jaytichiča, ninaca ana zuma pinsiñi kuzziz cjisjapa, nižaza ana zuma cjujchi kamañchiz cjisjapa.

²⁹ Ninacž kuzquiz walja tjapaman ana zumanaca želatča, chjippipacha. Jalla tižta ana

zumanaca želatčha; ana Yooz kuzcama kamz, adulteriuquiz ojklayz, žoňž quintra ana wali paaz, yekja žoňžquiztan zmaz, nižaza tjapa ana walimi paaz pecni kuz želatčha. Nižaza ninacž kuznaca tižtačha: iñiziñi kuz, žoñi coñi kuz, žoňžtan quiija ojklayz kuz, incallñi kuz, ana wal paaz pecni kuz, nižaza ana wal quintu joojooñi kuz. Jalla nižta anawali kuzziz žoñi žejlčha.

³⁰ Ninacaqui žoňž quintra chiiñinacačha. Yooz quintra chjaawjkatñičha. Nižaza žoñi iñarñičha, nižaza mitarazi kuzzizza, persunpacha honora waytisñičha. Nižaza ana zuma paazjapa tantiiñičha, nižaza maa ejp ana cazñičha.

³¹ Nižaza Yooz puntu ana intintiz pecničha, nižaza chiižcupacha niž taku ana cumpliñičha. Nižaza ana jec žoňžtanami munaziñičha. Nižaza ana pertunñičha. Nižaza ana jec žoňžquizimi okžñi kuzzizza.

³² Yoozqui mantichičha, jalla nižta žoñinacaqui ticzpan waquizičha. Jalla nuž Yooz mantita zizcumipacha, nii ana wali žoñinacaqui nižta ana wali paazkaz pecničha, nižaza yekjaž nižta ana wali paanami, “Walikazza” cjiñičha.

2

YOOZZA LIJITUMA PJALZÑIQUI

¹ Jakzilta žoñit tsjii uj paachi žoňžquiztan “Yooz nii casticla” cjican chiičhaja, jalla nii žoñiqui ana nižta ujpacha paaz waquizičha. Jalla nižta ujpacha paaquičž niiqui, persun casticu chiičha. Nižaza Yooz yujcquiziqui anaž razunchiz cjesačha niž persun paata ujquiztan.

² Yoozqui uj paañinaca lijituma pjalznaquiĉha, casticzjapa. Jalla nii uĉhum zizza.

³ Jequit yekja uj paañi ŷoñž quintra chiiĉhaja, niŷaza niŷta ujkakaz persuna paaĉhaja, jalla ni-iqui anapanž atipasaaĉha Yoozquiztan. Panž castictazakaz cjequiĉha. Uj paažcu, anapan pinsa, “Ana Yooziž casticta cjeeka” cjican.

⁴ Jalla niŷta pinsiñi ŷoñinacaqui Yooz puntu ana zuma intintiĉha. Yoozqui ancha zumaĉha, niŷaza tsjan juc'anti okzñi kuzzizza, niŷaza tsjan juc'anti pasinsis kuzzizza. Jalla nii werar razunaĉha. Pero jalla niŷta kuzziz cjen, Yoozqui ŷoñinacžquiz persun uj sint'iskatz pecĉha. Nuž sint'iskatzcu ujnaca paazqui eca. Jalla nuž pecĉha Yoozqui. Jalla nii zizza anĉhuc, ¿ana jaa?

⁵ Anĉhucqui ana persun uj sint'iñiž cjen, niŷaza chojru kuzziz cjen, juc'anti castictaž cjequiĉha Yooziž ultimu pjalz tjuñquiziqui. Jalla nii tjuñquiziqui Yoozqui ŷoñinacž paata ujnaca tjeeznaquiĉha; nekztan ultimuz casticaquiĉha.

⁶ Jalla nii tjuñquiziqui Yoozqui tjapa ŷoñinaca pjalznaquiĉha ninacaž paatiquiztan jama.

⁷ Jequit pasinsis kuzziz zuma kamañchiz kamĉhaja, jalla ninacaqui Yooztan wiñaya kamaquiĉha. Jalla nii zuma kamñinacaqui Yooziž tjaata honorchiz cjis pecĉha, niŷaza Yooziž rispitta cjis pecĉha, niŷaza Yooztan wiñaya kamz pecĉha.

⁸ Pero yekjapanacaqui persun kuzcamakaz kamz pecĉha, werar Yooz kamaña anaž pecĉha. Anawalinacž mantuquizpanž žejlĉha. Jalla ninacž quintra Yoozqui juc'anti žawjžcu casticaquiĉha.

⁹ Tjapa anawali paañinacžtami sufris

želaquiča, nižaza wali llaqui želaquiča. Anawali paañi judío žoñinacaqui juc'anti sufraquiča. Pero tjapa anawali paañi žoñinacaqui zakaz sufraquiča, infernuquinaqui.

¹⁰ Tjapa zuma kamñinacasti Yooziž tjaata honorchiz cjequiča, nižaza Yooziž rispittaž cjequiča, nižaza llan kuzziz cuntintu cjequiča. Nii zuma kamñi judío žoñinacaqui juc'ant waliž cjequiča. Pero tjapa zuma kamñi žoñinacaqui zakaz waliž cjequiča, arajpachquinaqui.

¹¹ Yoozqui žoñinaca ana illillžcu lijituma pjalz-naquiča.

¹² Yekjapanacaqui Moisés lii ana zizza. Jalla nižtiquiztan Yoozqui nii lii jaru ana casticaquiča; persun uj paatiquiztanjama casticaquiča. Yekjapanacaqui Moisés lii zizza. Jalla nižtiquiztan Yoozqui nii lii ana cumplitiquiztan jama casticaquiča.

¹³ Jakzilta žoñinacat Moisés lii nonžcu, ana nii lii jaru kamčhaja, jalla niiqui Yooz yujcquiziqui tira ujchizza. Pero jakzilta žoñinacat Moisés lii cazzaja, jalla niiqui Yooz yujcquiziqui ana ujchizza.

¹⁴ Ana judío žoñinacaqui Moisés lii ana zizza. Jalla nuž ana zizcumi, ninacpacha persun kuzquiz zuma paaz zint'asača, jaknužt Moisés lii zuma paaz mantičhaja, jalla nuž. Nekztan nii kuzquiz zint'ita jaru zuma kamcan, ninacžtaqui liižtakazza nii kuzquiz zint'itaqui.

¹⁵ Jalla nuž zuma kamcan kjanapacha tjeeža, Yoozqui ninacž kuzquizpacha niiž mantitanaca zizkatcha, nii. Nii Yooziž zizkattacama ana kamtiquiztan casticta cjequiča. Nižaza nii zizkattacama kamchižlaja, nekztan ana casticta cje-

quičha. Yooz pjalz tjuñquiziqui ninacaž kamtanac-quiztan jama pjaltaž cjequičha.

¹⁶ Yoozqui Jesucristužquiz žoñinaca pjalzkataquičha, chjojzaka paatiquiztanami, nižaza pinsitaquiztanami. Wejrqui niipan chiichinča liwriiñi Yooz puntu parlican.

JUDIO ZOÑINACAQUI MOISES LIICHIZZA

¹⁷ Yekjap ančhucquiztan judío žoñinacčhucča. Ančhucqui Moisés liichiz cjen “Walikaztča wejrqui” cjiñčhucča. Nižaza mitarazi kuzziz cjiñčhucča, “Werar Yoozza wejt Yoozqui”, cjicanaqui.

¹⁸ Ančhucqui jaknužt Yooz munčhaja, jalla nii zizza. Ančhucqui Moisés lii tjaajintaž cjen Yooz zuma kamaña panž zizza.

¹⁹ Yooz puntu ana zizñi žoñinaca želan, ančhucqui cjiča, “Nii zuražtakaz žoñinacžquiz tjaajznasak” cjican. Nižaza ana wal zumchiquiztakaz kamñi žoñinaca želan, ančhucqui cjiča, “Nii ana wal kamñi žoñinacžquiz Yooz zuma kamaña tjaajznasak” kaž cjiča; “Werjtča ninacžtaqui kjanažtakaz” cjican.

²⁰ Nižaza ančhucqui cjiča: “Zumzu kamñi žoñinacžquiz Yooz kamaña sok’o tjaajznasak, ana tsjii kjutñi kamajo”, kaž cjiča. Nižaza ančhucqui cjiča: “Yooz puntu koloculla zizñi žoñinacžquiz tjaajznasak”, kaž cjiča. Yooz puntu razunanacaqui Moisés liiquiz kjana žejlča. Jakziltat Moisés lii zuma zizaja, niiqui Yooz puntuquiztan zuma zizñi zizñi cjequičha.

²¹ Jaziqui ančhucqui yekjžquiz tjaajznasaz ni-iqui, ¿kjažtiquiztan amiž tjaajinta jaru ana kamjo?

Nižaza yekjap ančhucaquiztan chiižiniñchucča, tuž cjian: “Anača tjañi zaazqui”. Jalla nuž chiižcu, ħkjažtiquiztan ančhucpacha tjañi zaajo?

22 Nižaza ančhucqui cjiñchucča; “Anača adulteriuquiz ojklayzqui”. Jalla nuž chiižcu, ħkjažtiquiztan ančhucpacha adulteriuquiz ojklayjo? Ančhucqui žoñiž paata yooznaca chjaawjča. Jaziqui, ħkjažtiquiztan ančhucqui timplu cusasanaca cjižjo?

23 Ančhucqui mit kuzziz cjiñchucča: “Wejrnacqui Moisés liichiztča”. Jalla nuž chiižcu, ħkjažtiquiztan ančhucqui nii lii ana cazjo? Ančhucqui nižta ana cazziž cjen Yoozquiz ana rispitiča.

24 Cjijrta Yooz takuqui razunapanž chiiča. Yooz takuqui tuž cjiča: “Ančhucaž uj paachiž cjen yekja wajtchiz žoñinacaqui ultim werar Yooz quintraž chiiča”.

25 Tsjii chiižinuča. Ančhuc judío jilanacaqui Moisés lii jaru janchiquiz chimputa cjissinčhucča. Moisés lii jaru kamchiž cječhaj niiqui, ančhucžtaqui nii chimputa walča. Pero Moisés lii jaru ana kamchiž cječhaj niiqui, nii chimputaqui anaž walča.

26 Jaziqui tsjii ana chimputa žoñiqui Moisés lii jaru kamchi cječhaja, jalla niiqui Yooz yujcquiziqui chimputažtakaz cjequiča, niž janchiquiz ana chimputa cjenami.

27 Nižaza jakzilta ana chimputa žoñit Moisés lii jaru kamchi cječhaja, jalla niiqui ančhuca uj tjeēža. Ančhucqui chimputaž cjenami nižaza Moisés cjijrta liichiz cjenami, jalla nii lii ana cazza.

²⁸ Jakziltat juntuñkaz lii jaru paačhaja, jalla ni-
iqui anača ultimu Yooz maatiqiu. Nižaza jakzil-
tat janchiquiz alaja chimputa cječhaja, jalla niiqui
anača ultimu Yooz maatiqiu.

²⁹ Pero jakziltat tjapa kuztan Yooz kuzcama
kamčhaja, jalla niiča ultimu Yooz maatiqiu.
Nižaza niiqui persun kuzquiz ultimu Yooziž chim-
putača. Tsjii cjiirta lii jaru juntuñkaz kamz
anača chekanaqui. Zoñž kuzquiztanča kamz
chekanaqui, lijituma Yoozquin kuzziz, už ana li-
jituma Yoozquin kuzziz, nii. Jalla nižta lijitum
kuzziz žoñiqui Yooziž tjaata honorchizza. Zoñiž
tjaata honora anaž importičha.

3

¹ Yooz yujcquiziqui judío žoñinacaqui yekja
wajtchiz žoñinacžquiztan tsjan walasaž
niiqui, ěchjuljapat waljo? Nižaza janchiquiz
chimputaqui, ěchjuljapat waljo?

² Judío wajtchiz žoñinacaž cjican, zuma walča.
Tužuča primer razunaqui. Judío žoñinacžquiz
Yoozqui niž cjiirta taku cumpjiičičha.

³ Nii Yooziž tjaata lii jaru yekjap judío
žoñinacaqui ana lijituma kamčiča. Jalla nuž
ana lijituma kamčiž cjen, ninacaž compromitta
taku ana cumplissičha. Jalla nuž cjenami Yoozqui
niž persun compromitta taku cumpliča.

⁴ Nužupanča. Yoozqui taku chiižcu panž
cumpliča, tjapa žoñinacaž chiita taku ana
cumpličiž cjenami. Cjiirta Yooz takuqui tuž
cjiča:

“Yooz, amiž chiitaqui lijitumača. Jalla nii ziztaj
cjila. Zoñinacaž am quintra uj tjojtunchiž

cjenami amqui lijitumapankaz tjeežtaj cjila”.

⁵ Zoñinacaž toscara chiitaqui juc'ant tjeeža, Yoozza lijitumaqui, nii. Jaziqui, ¿kjaž cjeequi? Yoozqui nii toscara chiiñi zoñinaca ana casticz waquiziča. ¿Nuž chiyasajo?

⁶ Anapanča. Yoozqui lijitumapanča. Nižaza Yoozqui uj paañi zoñinaca ana casticaquiž niiqui, inakaz jusjasača.

⁷ Yekjapanacaqui tuž cjiñiča: “Wejt toscara chiitaqui, Yooz lijitumaž, nii tjeeznaquiž niiqui, ¿kjažtiqiztan wejrqui casticta cjesajo? Weriz toscar chiitiqiztan Yoozqui juc'anti rispitta cjesača”. ¿Jalla nuž pinsichinčucjo? Jalla nii razunaqui ancha zumzuča.

⁸ Nižaza yekjapanacaqui cjiñiča: “Anazuma paatiqiztan zuma paaznaca tsjan kjana tjeežta cjesača. Nekztan nii anazumanaca paaz waquiziča”. Nižaza cjiñiča: “Pablo zakaz nuž tjaañiča”. Jalla nuž cjican, yekjap zoñinacaqui wejtnac quintra chiiča, wejrnacaž ana rispitta cjeajajo. Jalla nižta chiiñi zoñinacaqui casticta cjis waquiziča.

TJAPA ZOÑINACAQUI UJ PAACHA

⁹ Nekztan, ¿kjaž cji? ¿Učhum judío zoñinacaqui parti zoñinacžqiztan tsjan wali zoñinacajo? Anapanž cjesača. Wejrqui kjanapacha tjeezinča, judío wajtchiz zoñinacami nižaza yekja wajtchiz zoñinacami tjappacha ujž mantuquiz žejlča, nii. Tjapa zoñinacami uj paazquin kuz tjaača.

¹⁰ Jalla nižtapacha cijjrta Yooz takuqui cjiča:

“Anaž jec lijitum kamañchiz zoñimi žejlčha, ana zintallami.

11 Anaž jec Yooz kamaña intintiñimi žejlčha, anaž jecmi Yoozta kamzquin kuz tjaachha.

12 Tjapa zoñinacaqui Yoozquiztan tsjii kjutñi zarakčha, nižaza ana zum kuzziz cjissa. Anaž jakziltami zuma paañic žejlčha, ana zinta.

13 Ninacž joranacquiztan anazuma chiitanaca ulančha, ticzinacž sipultura cjetžtažokaz. Chican, zoñinaca incallčha. Zkorž atquiz žejlñi venenožtakazza ninacaž atquiztan chiitaqui.

14 Ninacaž chiitaqui zoñž quintrapanchha, nižaza zoñžtan chjaawjkatčha.

15 Ninacž kjojchaqui apura zajtčha, zoñi conzjapa.

16 Ninacaqui zoñi akz pecčha, nižaza zoñžquiz llaquit kuzziz cjiskatčha.

17 Nižaza llan kuzziz kamaña anapan zizza.

18 Nižaza werar Yooz rispits puntuquiztan anaž pinsičha”.

19 Jakziltat tuquita Moisés lii mantuquiz žejlčhaja, jalla niiqui nii lii jaru kamstančha. Pero tjapa nii liichiz zoñinacaqui ana nii lii jaru kamčha. Jalla nižtiquiztan ch'uju cjissičha. Ana chiyasačha, “Wejrqui ana ujchiztčha” cjicanaqui. Tjapa zoñinacaqui, jaknužt kamčhaja, jalla nii cuenta Yoozquin tjaastančha. Tjapa zoñinacaqui Yooziž casticta cjis waquizičha.

20 Anaž jakziltami Moisés lii jaru zumpacha lijituma kamčha. Jalla nižtiquiztan Yooz yujcquiziqui anaž jakziltami ana ujchizza. Moisés lii zizcumi uj paaspančha. Jalla nižtiquiztan nii lii jaru ana kamtiquiztan tjapa zoñinacaqui zizza, panž ujchizza, nii.

¿ŽOÑINACAQUI, JAKNUZT ANA UJCHIZ CJESAJO?

²¹ Moisés liiquiztan Yoozqui yekjat lii jaru žoñinacžquiz ana ujchiz nižaza zuma cjiskatča. Pero nii puntu Moisés liimi nižaza profetanacaž cijjrta takumi zakaz chiiča.

²² ¿Jaknužt žoñinacaqui ana ujchiz cjesajo? Jalla tužuča. Jakziltat Jesucristužquiz kuz tjaačhaja, jalla niiqui Yooz yujcquiziqui ana ujchiz nižaza zuma cjequiča. Yoozqui žoñinaca ana illilla.

²³ Tjapa žoñinacaqui tsjii pariju ujchizza. Jalla nižta ujchiz cjenaqui Yoozqui ana jecžquizimi honorchiz cjiskatasatča.

²⁴ Pero Jesucristuqui ujchiz žoñinacžta persun wiržtan pacchiča, ninaca ana casticta cjeajo, nižaza Yooz yujcquiz zuma cjeajo. Yoozqui Jesucristo cuchanžquichiž cjen žoñinacžquiz pajk favora paachiča. Jalla nuž cjen Yoozqui inat žoñinaca liwriyasatča, ninaca ana čjulu paažcu.

²⁵ Yooz Ejpqui Jesucristo cuchanžquichiča ujchiz žoñinacž laycu ticzjapa. Niiž ticziž cjen jakziltat Jesucristužquin kuz tjaačhaja, jalla niiqui persun ujquiztan ana castictaž cjequiča. Tuquitan ima Jesucristuž ticznan Yoozqui niižquin kuzziz žoñinacžtajapa pasinsis kuzziztatča; ninaca ana casticchiča. Pero Yoozqui uj paañinaca casticstanča. Jalla nuž cjenami Jesucristuž cjen Yoozqui ujchiz žoñinaca pertunasatča. Jalla nižtiquiztan Jesucristo cuchanžquichiž cjen Yoozqui, persun kuz zuma lititumaž, jalla nii tjeeziča.

²⁶ Uj paañi žoñinaca ana castictaž cjenami, Yoozqui lititumatča. Uj paañi žoñinacaqui Jesucristuž ticziž cjen ana castictatča. Jakziltat Jesu-

cristužquin kuz tjaačhaja, jalla niiqui Yooz yujcquiziqui zuma cjissa, ana ujchiz, Jesucristuž cjen.

27 Jaziqui žoñinacaqui anapanž mitarazi kuzziz cjis waquizičha, “Yooz yujcquin walikaztčha wejrqui” cjicanaqui. ¿Kjažtiquiztan mit kuzziz ana nuž chiyas? Anaž jecmi Moisés lii jaru zuma kamchucaqui. Jalla nižtiquiztan ana lii jaru kamchiž cjen tjapa žoñinacaqui Yooz yujcquiz ujchizza. Jesucristužquin kuz tjaachiquiztan, jalla nužquizkaz Yooz yujcquiz zuma cjesačha, ana ujchiz. Jalla nižtiquiztan žoñinaca ana mitaraz kuzziz cjis waquizičha.

28 Wejrqui kjanapacha tjaajinchinčha, Jesucristužquin kuz tjaachiž cjen Yooz yujcquiz ana ujchiz nižaza zuma cjesačha, jalla nii. Moisés lii jaru kamchiž cjen Yooz yujcquiz anapančha zuma kuzziz cjichuca.

29 ¿Yoozqui judío žoñinacž Yooz alaja cjesajo? Anapančha. Yoozqui parti žoñinacž Yoozzakazza.

30 Zinta Yoozqui žejlčha. Jalla niž yujcquiziqui chimputa judío žoñinacami ana chimputa yekja wajtchiz žoñinacami Jesucristužquin kuz tjaachiž cjenkaz zuma cjesačha, ana ujchiz.

31 Jalla nižtiquiztan nuž tjaajincan wejrqui, “Moisés liiqui anaž walčha”, ¿nuž cjican tjaajnojo? Anazal nižta tjaajnučha. Liiqui panž walčha, cjiwčha.

4

ABRAHAMZ PUNTU

1 Wejrnacqui Abrahamž majch maatinacquiztan tjoniñčhumčha. Tuquita atchi Abraham ejpž puntuquiztan, ¿kjaž cjii?

² Abrahamqui Moisés lii jaru kamtasaz niiqui Yooz yujcquiz ana ujchiz cjitasachá. Nižaza “Wejrtčha Yooz yujcquiz zumtqui” cjican chii atasachá. Pero ana nuž chii atatčha Yooz yujcquiz-iqui.

³ Cjijrta Yooz takuqui tuž cjičha: “Abrahamqui Yoozquin kuz tjaachičha. Jalla nižta kuz tjaa-tiquiztan Yooz yujcquiz zumaž cjissičha, ana ujchiz”.

⁴ Tsjii zakal chiyučha. Jakziltat langznačhaja, jalla niiqui paca tanznaquičha. Nii pactaqui anačha onanta, pero langztiquiztan nižta pacta cjis waquizičha.

⁵ Pero jakzilta ujchiz žoñinacat ana čhjulu paažcu, Yoozquin kuz tjaačhaja, jalla niž kuz tjaatiquiztankazza Yooz yujcquiz ana ujchiz, nižaza zuma kuzziz. Ujchiz cjicanpacha kuz tjaatiquiztan Yoozqui cjičha, “Nii žoñž uj pertunučha. Wejt yujcquiz ana ujchizza”.

⁶ Ana čhjulu paažcu nii kuz tjaañi žoñiqui ana ujchiz cjissa. Jalla nižta kuz tjaañi žoñž puntu David cjita tuquita ejpqui

⁷ tuž cjichičha:

“Jakzilta žoñinacž ujnacat Yooziž pertunta cječhaja, nižaza ninacž ujnacat Yooziž ana iya tjeežta cječhaja cuntintuž cjila.

⁸ Nižaza jakzilta žoñinacat ujnacquiztan Yooz Jil-iriž ana casticta cječhaja, jalla nii žoñiqui cuntintuž cjila”.

⁹ Nii Davidž chiitaqui ¿jec žoñž puntuquiz-tantajo? ¿Chimputa žoñinacž puntuquiztan alajakazkaya? ¿Už yekja wajtchiz ana chimputa

žoñinacž puntuquiztan jaa? Wejrqui cjiwča pizc-quiztanpachača. Abrahamqui Yoozquin kuz tjaachiž cjen Yooz yujcquiz ana ujchiz cjissiča.

¹⁰ ¿Ĉhjulorquiztanpacha ana ujchiz cjissitaya? ¿Ima chimpuchiz cjen? uŝ ¿chimpuchiz cjen jaa? Wejrqui cjiwča, anača chimpuchiz cjen Yooz yujcquiz ana ujchiz cjissiqui, pero ima chimpuchiz cjen.

¹¹⁻¹² Ima chimputa cjican Abrahamqui Yoozquin tjapa kuz tjaachiča. Jalla niŝtiquiztan Yooz yujcquiz ana ujchiz niŝaza zuma cjissiča. Jalla niŝ wiruñ Yoozqui nii chimputa lii mantichiča tjeezjapa kuz tjaachiž cjen Yooz yujcquiz ana ujchizza, zuma kuzzizza, jalla nii tjeezjapa. Jalla niŝtiquiztan Abrahamqui tjapa Yoozquin kuz tjaañinacžta ejpžtakazza, ana chimputa žoñinacžtami, niŝaza chimputa žoñinacžtami. Jalla nuŝ pinsichiča Yoozqui. Jakziltat kuz tjaachiž cjen Yooz yujcquiz ana ujchiz, niŝaza zuma kuzziz cjisnačhaja, jalla ninacaqui Abrahamž ultim majchmaatinaca cjequiča. Učhum Abraham ejpqui ima chimputa cjican Yoozquin kuz tjaachiča. Jakzilta chimputa žoñinacat Abrahamžtapacha Yoozquin kuz tjaačhaja, jalla ninacaqui Abrahamž ultim majchmaatinaca cjequiča. Chimputakaz ana walča, Yooz yujcquiz zuma cjeajajo.

YOOZIZ TJAATA TAKU

¹³ Yoozqui Abrahamžquizimi niŝ majchmaatinacžquizimi comprometcan taku tjaachiča, tii muntuquiz cuntintuž cjequiča, jalla nii. Abrahamž lii jaru kamtiquiztan Yoozqui ana niŝta

taku tjaachiĉha. Pero Yoozquin kuz tjaachiž cjen nižaza zuma kuzziz cjen, Yoozqui nižta taku tjaachipanĉha.

¹⁴ Moisés liichiz kamñi žoñinacaqui tii muntu irinsa tanznaĉhaj niiqui, jalla nižtiquiztan Yoozquin kuz tjaazqui inakazza. Nižaza Yooziž tjaata taku anaž walkatĉha. Pero anaĉha nižta. Anaž jecmi nii lii jaru zuma kamasatĉha.

¹⁵ Jaziqi lii jaru ana kamtiquiztan žoñinacaqui casticta cjistanĉha. Lii ana žejltasaĉha, nekztan lii quintra ana kamtasaĉha.

¹⁶ Jalla nižtiquiztan Yoozquin kuz tjaatiquiz-tankaz Yooz yujcquiz ana ujchiz, nižaza zuma kuzziz cjesaĉha. Nižaza Yoozqui žoñinacžquiz okziž cjen žoñinaca ana ujchiz cjiskatĉha. Jalla nii wali pajk favora paachiĉha Yoozqui. Jalla nuž cjen Yooziž tjaata takuqui tirapanž walĉha tjapa Abrahamž majchmaatinacžtaqui, Moisés liichiz žoñinacžtami, ana Moisés liichiz žoñinacžtami. Yooziž tjaata takuqui walĉha tjapa Abrahamžtapacha Yoozquin kuz tjaachinacžtaqui. Abrahamqui tjapa uĉhum Yoozquin kuz tjaachi žoñinacž ejpžtakazza.

¹⁷ Jalla nužupanž cijirta Yooz takuqui chiiĉha, tuž cijan: “Amqui wacchi nacionchiz žoñinacž epim cjequiĉha”. Jalla nižtiquiztan Abrahamqui uĉhum ejpžtakazza, Yooz yujcquiziqui. Abrahammi uĉhumnacami nii zinta Yoozquin kuz tjaachinĉhumĉha. Nii zinta Yoozqui ticzinacami jacatatskatĉha, nižaza ana žejlñinaca žejlzkatĉha.

¹⁸ Abrahamžquiz Yoozqui cjichiĉha: “Amqui wacchi nacionchiz žoñinacž epim cjequiĉha”. Jalla nii puntuquiztan zakaz Yoozqui Abrahamžquiz

cjichiča: “Jalla nuž amqui wacchi majchmaati-nacchiz cjequiča”. Yooz taku criichiž cjen Abrahamqui wacchi majchmaatinaca tjew tjewziča, chawcwacama. Tsjii žoñinacaž “Amiž tjaata Yooz taku ana cumplita cjesača” nuž chiiñi cjenami Abrahamzti tira tjewziča, Yooz taku cumplispanž cjican.

¹⁹ Abrahamqui jos patac watchiz cjen ticz orquiztača. Ana majchchizpan cjichucatača. Nižaza niž maatakaqui ana zinta majtchucatača. Jalla nuž pucultan ana majtchuca cjicanami, Abrahamqui Yoozquin anača upa kuzziz.

²⁰ Nižaza ana kuz turwayskatchiča. Yooziž compromitta taku cumplis ora tirapan tjewziča, cumpliscama. Tirapantača Yoozquin kuzziz. Nižaza Yooz honora waytican, juc'anti Yoozquin kuzziz cjissiča.

²¹ Abrahamqui zizziča, Yoozqui niž compromitta taku ultimupan cumpli atasacha. Jaziqui tirapan tjewznatča, ana kuz paysnakžcu.

²² Jalla nižtiquiztan nižta Yoozquin kuz tjaa-tiquiztan Abrahamqui Yooz yujcquiz ana ujchiz cjissiča, nižaza anča zuma kuzziz.

²³ Jalla nuž Yooz tawk liwruquiz cijirtatača. Nii cijjrtaqui anatača Abrahamž cjen alajakaz,

²⁴ učumnacaltajapa zakaz cijirtatača. Jakzilat Yoozquin kuz tjaačhaj niiqui, Yooz yujcquiz ana ujchiz cjisnasača. Nii Yoozqui učum Jesucristo Jiliri ticziquiztan jacatatchiča.

²⁵ Jesucristuqui učum ujquiztan contatača; nižaza niž jacatatchiž cjen učumqui Yooz yujcquiz ana ujchiz nižaza zuma cjissinčhumča,

niižquin kuz tjaachiž cjen.

5

YOOZQUIN KUZIZ ZONINACA

¹ Jalla nižtiquiztan Yooz yujcquiz ana ujchiz, nižaza zuma kuziz cjen, Yoozqui anača ućhum quintra. Jesucristo Jiliriž cjen, nižaza niižquiz kuziz cjen ućhumtan Yooztan walikazza.

² Jesucristužquin kuziz cjen ućhumqui Yooz partiquiz luzzinćhumča. Jalla nii partiquiz ućhumnacaqui panž žejlča. Jalla nuž žejlcan cuntintuž tjewža, Yooziž tjaata honora tanz ora, Yooztan honorchiz cjisjapa.

³ Nii Yooz zumanaca tjewžcan, ućhumqui cuntintućhumča. Nižaza sufris želanaqui cuntintuzakazza. Sufrisquiztan pasinziz kuziz cjissa. Jalla niiqui ućhumqui zizza.

⁴ Nižaza pasinziz kuziz žejltiquiztan Yoozquin tjurt'iñi kuzizpan yatisinsa. Jalla nekztan zumquin yatisinžcu, Yooz honora tjaaz ora tjewža.

⁵ Yoozqui niiž Espíritu Santo ućhumnaca kuzquiz luzkatchiča. Nii Espíritu Santuqui ućhum kuzquiz luzcu, Yooz anča zuma munaziñi kuz ućhumquiz intintiskatča. Jalla nižtiquiztan Yooziž tjaata honora tjewžcan ućhumqui zizza, ultimquiziqui panž tanznaquiča, nii. Ana inakaz tjewznaquiča.

⁶ Ućhumpacha ujquiztan anatača liwriizuca. Jalla nižtiquiztan Yooziž pinsita timpuquiz Cristuqui ujchiz žoñinacž laycu ticziča.

⁷ Anaž jakzilta žoňimi tsjii žoňžtajapa pjasila ticznasača, zuma žoňi cjenami. Cunamit tsjii ancha zuma kuzziz žoňžtajapa ticz pecačhani.

⁸ Yoozti niž zuma okzňi kuz tjeeziča, jalla tižta. Učumnaca ujchiz cjenami Yoozqui niž Majch Jesucristo cučanžquichiča, učumnacaltajapa ticzjapa.

⁹ Jalla nižtiquiztan Yooz Majch ticziž cjen anziqiu učumqui Yooz Ejpž yujcquiz ana ujchizza, nižaza zuma kuzzizza. Jalla niic zuma razunača. Jaziqiu učumqui zuma kuzzizza. Jalla nižtiquiztan tiizakaz zuma razunača: Jesucristuž ticziž cjen učumqui ultim casticz tjuñquiziqui liwriitaž cjequiča Yooz casticquiztan.

¹⁰ Tuquitan učumnacaqui Yooz quintratača. Jalla nuž Yooz quintra želanami, Yoozqui niž Majch cučanžquichiča, žoňinacž laycu ticzjapa, žoňinacž pertunta cjeyajo. Jalla niiqui razunača. Nižaza anziqiu učumqui Yooz pertuntača. Jalla nižtiquiztan učumtan Yooztan walikazza. Nižaza Yooz Majch jacatattiquiztan učumqui ultimquiziqui tjapa anawalinacquiztan liwriitapanž cjequiča, Yooztan wiňaya kamzjapa. Jalla niiqui zuma razunazakazza.

¹¹ Ultimquiziqui liwriitaž cjequiča. Nižaza anzimi liwriitazakaz učumqui. Jalla nižtiquiztan učumqui Yooztan tsjii kuzziz cjican, cuntintuča, Jesucristo Jiliriz cjen. Jesucristuž cjen učumqui Yooziž pertunta cjissiča. Jalla nižtiquiztan učumtan Yooztan walikazza.

ADANZTAN JESUCRISTUŽTAN

¹² Tsjiilla cjesača. Tsjii žoñiž cjen uj žejlča tii muntuquiz. Nižaza nii ujquiztan ticz žejlča. Nižaza tjapa žoñinacami uj paača. Jalla nuž uj paažcu, ticža.

¹³ Moisés liiž tuquiqui uj paažqui želatča tii muntuquiz. Pero ana liichizlaj niiqui, žoñinacauqui nii lii quintra paata ujquiztan ana castictatača.

¹⁴ Adanž timpuquiztanpacha Moisés timpucama žoñinacauqui ticziča uj paatiquiztan. Jaknužt Adán primera uj paatčhaja, jalla nii ujpacha ana paachiča parti žoñinacauqui. Jalla nuž cjenami yekja ujnaca paachiča. Adanqui tjonñi Jesucristužtakaz tjapa tii muntuquiz žejlñi žoñinacžquiz contajichiča. Jalla nii puntuquiztan Adanžtan Jesucristužtan cassa.

¹⁵ Pero tii puntuquiztan anaž cassa. Adanž uj paatiquiztan anawalinaca žejlča. Cristuž ticz-tiquiztan zti zumanaca žejlča. Tsjii žoñiqui uj paachiž cjen tjapa žoñinacžquiz ticskatča. Jalla niičha Adanqui. Nižaza tsjii žoñiž cjenkaz walja žoñinacauqui ujquiztan liwriitača. Jalla niičha Jesucristuqui. Jesucristuž cjen Yoozqui žoñinaca okziča. Žoñinacaž ana okžta cjichuca cjenami, Yoozqui žoñinacžquiz okziča. Jalla nuž okztiquiztan Yoozqui Jesucristuž cjen žoñinaca liwriichiča niiz yujcquiz ujchiz ana cjisjapa. Nužupanča.

¹⁶ Adanž uj paatižtan Jesucristuž liwriiñižtan anaž cassa. Punta puntaž žoñinacžquiz contajičha. Adanž zinta ujquiztan tjapa žoñinacauqui pjalžtača, casticta cjisjapa. Pero Jesucristuž liwriitiquiztan walja žoñinacauqui Yooz yujcquiz ana

ujchiz nižaza zuma cjissa, walja ujnaca paachiž cjenami. Jesucristuž cjenkaz nižta cjissa.

17 Tsjii žoňž ujquiztan tjapa žoňinacaqui ticstanča. Jalla niic razunača. Tiiqui tsjan zuma razunača. Jakziltat Jesucristuž cjen ujquiztan liwriita cječhaja, jalla niiqui Yooz yujcquiz ana ujchiz cjequiča. Nižaza ujquiztan ticziž cjenpacha, Yooztan wiňaya kamaquiča. Nižaza honorchiz cjequiča.

18 Jaziqui tsjii žoňž ujquiztan tjapa žoňinacaqui pjalžtača casticta cjisjapa. Nižaza tsjii žoňž ticztiquiztan tjapa žoňinacaqui ninacž ujquiztan pertunta cjesača, ninacž ujquiztan ana casticta cjeajo, nižaza Yooztan wiňaya kamajo.

19 Yooz mantita ana cumplichiž cjen Adanqui tjapa žoňinacžquiz ujchiz cjiskatča. Jesucristuzti Yooz kuz cumplichiž cjen walja žoňinacžquiz Yooz yujcquiz ana ujchiz, nižaza zuma cjiskatča.

20 Yoozqui Moisesquiz tsjii lii tjaachiča, žoňinacžquiz persun ujnaca kjanapacha tjeezjapa. Nii lii zizcuqui žoňinacaqui lii quintra juc'anti uj paachiča. Jalla nuž juc'anti uj paachiž cjenami, Yoozqui niž okzñi kuz žoňinacžquiz juc'anti tjeeziča Jesucristuž cjen.

21 Uj paažcu žoňinacaqui ticstanča, nižaza casticta cjistanča. Pero žoňinacž ujnacquiztan in fiernuquin castictaž cjenpacha Yoozqui žoňinaca liwriichiča Jesucristo jiliriž cjen. Žoňinacaqui Jesucristuž cjen Yooz yujcquiz ana ujchiz, nižaza zuma cjisnasača, Yooztan wiňaya kamzjapa.

6

EW KAMAÑA PUNTU

¹ Uj puntuquiztan yekjapanacaqui chiiñiicha. Uchumqui tira uj paaz waquiziicha, Yooz okzñi kuz juc'anti tjeežta cjisjapa.

² Pero wejr cjiwča, anapanž uj paaz waquiziicha. Tuquitan ticzi žoñinacažtakaztača uchumqui, anazum kamañchiz kamcan. Pero uchumž tuquitan anazuma uj paañi kamañquiztan jaytichinčumča. Jalla nižtiquiztan uj paañi kamañchiz anapanž kamz waquiziicha.

³ Tjapa uchumnacaqui, Jesucristužtan tsjii kuzziz cjissinčumča. Bautistaž cjen nekz tjeezinčumča. Jesucristuqui ticžcu, tjatztatača. Jalla nižta irata uchumqui anazum uj paaznaca tjatz waquiziicha. Jalla nii uchumnacaqui panž zizza.

⁴ Bautista cjiscu, nižaza Jesucristužtan tsjii kuzziz cjiscu, uchumnacaqui uj paañi kamañquiztan jaytichinčumča. Nekztan zuma ew kamañchiz cjissinčumča. Yooz Ejpqui persun aztan Jesucristo ticziquiztan jacatatskatchiicha. Jalla nižta irata Yoozqui uchumnaca anazuma kamañquiztan liwriichiicha, zuma ew kamañchiz cjejajo.

⁵ Jakziltat Jesucristužtan tsjii kuzziz cječhaja, jalla niiqui Jesucristužtan ticziicha, anazum uj paañi kamañquiztan liwriita cjisjapa. Nižaza jakziltat Jesucristužtan tsjii kuzziz cječhaja, jalla niiqui Jesucristužtan jacatatchiicha, ew zuma kamañchiz cjisjapa.

6 Jaknužt Jesucristuqui cruzquiz ch'awcta ticzižlaja, jalla nižta irata učumqui ticzižtakaz cjissiča uj paaz pecñi kuzquiztan. Jalla nižtiquiztan učum anazum uj paaz pecñi kuzqui nužquiz ana azziz cjissiča. Nižaza nii uj paaz pecñi kuzqui ana iya mantasača učum kuzquizpacha. Jalla nii učumqui panž zizza.

7 Jakziltat uj paaz pecñi kuzquiztan ticzi cječhaja, jalla niiqui uj paañi kamañquiztan liwriita cjequiča.

8 Nižaza jakziltat Jesucristužtan tsjii kuzziz cjissiz cjen uj paañi kamañquiztan liwriita cječhaja, jalla niiqui ew kamañchiz cjequiča, Jesucristužtakaz. Nižaza Jesucristužtan chica kamaquiča. Jalla nii razuna criichinčumča.

9 Jesucristuqui ticziquiztan jacatatchiča. Jalla nižtiquiztan ana wilta ticznaquiča, niižtaqui ana iya ticz žejlča.

10 Jesucristuqui žoñinacž ujquiztan ticziča, tsjii wilta. Ana wilta ticznaquiča. Jaziqui žejtča, nižaza Yooztajapa kamča.

11 Jalla nižtiquiztan ančhucqui cjuñzna, uj paañi kamañquiz liwriitaž, nii. Jaziqui Jesucristo Jiliriz cjen Yooztajapa ew kamañchiz kamla.

12 Uj paaz pecñi kuzqui ana mantiskata, anazumanaca paajo.

13 Nii uj paaz pecñi kuzqui curpu mantis pecchaj niiqui, panž ewjasa. Pero ančuca curpu zuma paazjapa, nižaza Yooz sirwizjapa kuz tjaa. Ančhucqui anazum uj paañi kamañquiztan liwriita cjiscu ew zuma kamañchiz cjissinčucča. Jalla nižtiquiztan ančhucqui Yooz kuzcama

kamajo Yooz mantuquiz cjee, tjapa curpumi, nižaza kuzmi.

¹⁴ Ančhucqui anača iya Moisés lii mantuquiz. Okzñi Yooz mantuquizza ančhucqui. Jalla nižtiquiztan nii uj paaz pecñi kuzqui ana mantiskata.

YOOZ MANTUQUIZPANKAZ CJEE

¹⁵ ¿Kjaž cjesajo? Moisés lii mantuquiz ana žejlcan, nižaza okzñi Yooz mantuquiz žejlcan, ¿uj paañi kamañchiz želasajo? Anapanž cjesača.

¹⁶ Jakziltat tsjii zoñž mantuquiz žejlčhaja, jalla nii patrunž mantitanaca caspanikazza. Jalla nižta irata jakziltat uj paaz pecñi kuz mantuquiz žejlčhaja, ujnaca paasača; jalla nekztan Yooziž castictaž cjequiča. Nižaza jakziltat Yooz mantuquiz žejlčhaja, jalla niiqui Yooz kuzcama cumplis waquiziča. Jalla nekztan tsjan tsjan zuma kamañchiz cjequiča. ¿Nii ana ziz ančhucjo?

¹⁷ Tuquiqui ančhucqui uj paaz pecñi kuz mantuquiz žejlñitača. Nekztan Yooz puntu zuma werar razunanacaqui ančhucquiza tjaajintatača. Jaziqui jalla nii tjaajintanac jaru tjapa kuztan kamča. Jalla nižta ančuca zuma kamañchiz cjen Yoozquin gracias cjican chiyučha.

¹⁸ Jalla nižtiquiztan nii uj paazquiztan liwritičha ančhucqui. Nižaza zumanaca paazjapa tjapa kuz tjaachinčhucča. Yooz manta paaz cjissinčhucča.

¹⁹ Zoñž wirquiztan punta punta chiyučha, Yooz puntu intintazkatzjapa. Ana nižta chiitasaž niiqui, ančhucqui anaž intintaztasača. Tuquiqui ančhucqui uj paaz pecñi kuz mantuquiz želatča, ujnaca paacan. Jalla nuž žejlcan juc'anti juc'anti

uj paachinčhuctača. Jazizti Yooz mantuquiz tsjan tjapa kuztan žela, tsjan zumanaca paazjapa. Jalla nuž žejlcan Yooztakaz tsjan tsjan zuma kuzziz cjisnaquiča.

²⁰ Tuquiqui ančhucqui uj paaz pecni kuz mantuquiz žejlcan, zumanaca paazjapa ana importičha.

²¹ Jalla nuž kamcan, ančhucaltajapa ěchjul walitajo? Jaziqui ančucaž tuquita paatanacquiztan ančhucaltaqui azipanča. Jalla nižta anazum kamchi žoñinacaqui wiñayjapa Yooziž castictapanž cjequiča.

²² Pero ančhuczti nii anazum uj paañi kamañquiztan liwriitača. Yooz mantuquiz cjissinčhucča. Jalla nižtiquiztan ančhucqui tsjan tsjan zuma kamañchizza. Nižaza Yooztan wiñayaž kamaquiča.

²³ Jakziltat anazum uj paañi kamañquiz kamčhaja, jalla niiqui Yooziž castictaž cjistanča. Nuž waquiziča. Pero Yoozqui žoñinacžtajapa tsjii pajk favora paachiča, žoñinacaž ana waquizan. Nužukaz paachiča niiž zuma okzni kuzziz cjen. Jaziqui jakziltat Yooziž liwriita cječhaja, jalla niiqui Jesucristo Jiliriž cjen Yooztan wiñayaž kamaquiča.

7

LII PUNTU

¹ Moisés lii zizni jilanaca, cullaquinaca, ančhucqui zizza, ima ticzcan, žoñinacaqui Moisés lii mantuquiz žejlča.

² Nižaza tsjaa maatakqui zalz kamz lii mantuquiz žejlča, naaža lucu ticzcama. Naaža lucuž

ticznaquiž niiqui, nekztan naaqui nii lucutiñi kamañ liiquiztan liwriitača.

³ Jaziqui naaža persun lucu žetan, naaqui yekja luctakžtan želaquiž niiqui, jalla naaqui adulterio paacha. Naaža lucu ticznaquiž niiqui, jalla nekz lucutiñ kamañ liiquiztan liwriitača. Jalla nižtiquiztan yekja lucžtan zalžnanami, anaž adulterio cjesača.

⁴ Wejt jilanaca, cullaquinaca, jalla nižta iratača Moisés lii puntuquiztanaqui. Jesucristuqui ančhuca ujnacquiztan ticziča. Niiž cjen ančhucqui Yooz yujcquiz ana ujchizza, zuma kuzzizza. Moisés lii mantuquiz žejlcan, anapan zuma kuzziz cjisñi atchucatača. Jaziqui ančhucqui ticzi žoñižtakazza nii lii puntuquiztan. Jalla nižtiquiztan yekjaž mantuquiz žejlča, Jesucristuž mantuquiz, tsjii yekja lucžtan zalzižtakaz. Jesucristuqui ticziquiztan jacatatchiča, ančhucaž Yooztajapa zumanaca paajo.

⁵ Tuquiqui učhum persun kuzcama kamcan, učhum uj paaz pecñi kuzqui učhumnacaquiz mantiñitača, ujnaca paajo. Jalla nižta ujnaca paatiquiztan infiernuquin Yooziž casticta cjichucatača. Moisés liiquiz “Anača uj paazqui” cjican cjenami učhum uj paaz pecñi kuzqui juc'anti uj paazquin učhum chjitchiča.

⁶ Ima Jesucristužquin kuz tjaacan, jalla nižta kamchinčhumča. Pero jaziqui učhumqui Moisés liiquiztan liwriitača. Tuquita nii liiž mantuquiz učhum želatča, preso tanta žoñižtakaz. Anziqui Espiritu Santuž mantuquiz žejlča. Niiqui učhumnacaquiz ew kamaña tjaachiča.

¿JECT WEJR YANAPASAJO, ZUMA PAAZJAPAJO?

⁷ Jaziqui ¿kjažu cjeequi? ¿Moisés liiqui anawalejo? Anapanž cjesača. Moisés lii mantuquiz ana kamtasaž niiqui, wejrqui wejt ujnaca anal pajkattasača. Moisés liiquiz “Anača zmazñi kuzziz cjee” cjiča. Nekztan wejt zmazñi kuz zuma pajchinča.

⁸ Moisés liiquiz nižta mantita cjen, wejt uj paaz pecñi kuzqui tjamamana zmaz pinsichiča. Nii lii quintra ancha paaz pecatča. Pero nii liiqui ana žejltasaž niiqui, jalla nižtiquiztan nii zmazqui anaž pajta cjitasakalča.

⁹ Ima Moisés lii pajcan, cuntintul kamchinča. Nekztan Moisés lii mantitanaca pajtiquiztan wejt ujnaca pajchinča, nižaza juc'anti uj paachinča. Jalla nižtiquiztan persun kuzquiz weriž paata uj zint'ican, llaquita žejlchintača. Wejt persun uj paatiquiztan Yooz castictal cjis waquizuča.

¹⁰ Wejrqui Moisés lii jaru zumpacha kamtučaja, jalla nekztan Yooztan cuntintu kamtasača. Pero nii Moisés lii jaru ana zuma kami atchinča. Jalla nižtiquiztan nii liiž cjen wejtquiz tjeežtača, wejr castictal cjis waquizuča, jalla nii.

¹¹ Moisés liiquiz mantitanaca žejlča. Nii mantitanacaqui zizcuqui wejt uj paaz pecñi kuzqui juc'ant uj paaz pecchiča. Anapan nii lii jaru kami atatuča. Incallta cjissinča. Nii lii jaru ana kamtiquiztan, Yooz casticta cjichucatača.

¹² Moisés liiqui Yooziž mantitatača. Jalla nižtiquiztan ancha zumača nii liiqui. Nižaza nii liiquiz mantitami ancha zumapanča, nižaza Yooz kuzcamača, nižaza wejtta waliča.

13 Nii liiqui wejtta wali zumažlaj niiqui, ¿kjažtiquiztan nii liiž cjen Yooz casticta cjis waquizasajo? Nii liiqui zumača. Pero nii zuma lii zizcuqui, wejt uj paaz pecni kuzqui juc'anti ana wal uj paaz pecchiča. Jalla nekztan wejt quintra Yooz casticz žejlča. Jalla nižtiquiztan tjeežtača, wejt uj paaz pecni kuzqui ana zumapanča, nii. Nižaza Moisés lii quintra paatiquiztan tsjan juc'ant anazumaž cjissa wejt uj paaz pecni kuzqui.

14 Učhumqui zizza, Moisés liiqui Yooz Espiritu Santuž kuzcamača. Wejrzi persun kuzcama kamz pecuča. Jalla nižta kamcan wejt uj paaz pecni kuz mantuquiz želuča.

15 ¿Kjažtiquiztan nižta ana zuma paatojo? Anal intintazuča. Jesucristužquin kuz tjaažcu, jalla nekztanpacha zuma paaz pecni kuzziz cjissinča. Jalla nižta kuzziz cjenami, uj paaz pecni kuzzizpanča. Zuma paaz peccumi, anal zuma payi atuča. Ana pecta uj paaznaca, jalla niikal wilta wilta paa-uča.

16 Jalla nižta paachiž cjenaqui, wejrqui pajuča, Moisés liiqui zumača, jalla nii.

17 Ana zuma paacanami wejt kuzquiz zuma paaz pecuča. Jalla nižtiquiztan wejrpacha nii anazuma paatanaca anal iyal paaz pecuča. Pero wejt uj paaz pecni kuzqui nii ana zuma paatanaca paakatča.

18 Wejt uj paaz pecni kuzqui ana zumapanča. Yooz aztankaz zuma payi atasacha. Wejrqui zuma paaz pecanami, wejt persun aztan nii zuma paazqui anal atuča. Weriz kamtiquiztan nii razuna zizni cjissinča.

19 Wejrqui weriz zuma paaz pectanacaqui anal

paa-učha. Antiz weriž ana paaz pectanacaqui, nii ana zumanacal paa-učha.

²⁰ Jalla nižta ana weriž pectanaca paacan, wejr-pacha ana nižta paa-učha. Pero wejt uj paaz pecñi kuzqui nižta anazuma paakatčha.

²¹ Jalla nižtiquiztan wejtquiz nižtapan žejlčha. Zuma paaz pecanami, wejt uj paaz pecñi kuzkaz mantiz pecčha.

²² Wejt kuzquizpacha Yooz kuzcamapan paaz ancha pecučha.

²³ Jalla nuž cjenami uj paaz pecñi kuzziztčha. Wejt curpu mantiz pecčha. Jalla nižtiquiztan wejt uj paaz pecñi kuzqui wejt zuma paaz pecñi kuz quintrachha. Wejrqui anazuma paacan wejt uj paaz pecñi kuz mantuquiz želučha. Nižaza nii uj paaz pecñi kuzqui wejt curpu mantičha. Weriž kamtiquiztan nii razuna zizñi cjissinčha.

²⁴ Ana waličha wejrqui. Jalla nižtiquiztan ¿jequit tii ana zuma paañi curpuquiztan wejr liwriyaquiya? ¿Tii casticzkatñi curpuquiztanya?

²⁵ Yoozquin gracias cjican, chiyučha, učhum Jesucristo Jiliričha wejt liwriiñiqui. Wejrpacha tjapa wejt zuma paaz pecñi kuztan Yooz kuzcama kamučha, wejt uj paaz pecñi kuz uj paaz pecanami.

8

ESPIRITU SANTO KUZQUIZ ZEJLCHA

¹ Jesucristuž partiquiz žejlñi žoñinacaqui ana Yooziž casticta cjequičha. Ninacaqui Yooz Espíritu Santuž kuzcama kamčha; uj paaz pecñi kuzcama ana kamčha.

² Jesucristuž cjen wejrqui Espíritu Santuž mantuquiz želučha. Espíritu Santuž cjen ew kamañchiz

kamuča. Nii Espíritu Santuqui uj paaz pecni kuz mantuquiztan wejr liwriichiča. Uj paaz pecni kuz mantuquiz tira žejltasaž niiqui, Yooziž wiñaya casticta cjitasača.

³ Zoñinacaž uj paaz pecni kuz mantuquiz žejlcan, Moisés lii jaru ana kami atchiča. Jalla nižtiquiztan Yoozqui niž persun Majch cuchanžquichiča. Ujchiz zoñižtakaz curpuchiz kamchiča. Pero ana ujchizza niiqui. Zoñž curpuchiz cjican, ujchiz zoñinacž laycu ticziča. Jalla nuž cjen Jesucristuqui ujchiz zoñinacž cuntiquiztan casticta cjissiča, Jesucristužquin kuzziz zoñinaca ana casticta cjeyajo.

⁴ Moisés liiquiz Yooz kuzcama kamzqui mantitača. Jakziltat uj paaz pecni kuz mantuquiz kamčhaja, jalla niiqui Yooz kuzcama ana kamča, nižaza Moisés liicama ana kamča. Pero jakziltat Yooz Espíritu Santuž mantuquiz kamčhaja, jalla niiqui Yooz kuzcama kamča.

⁵ Jakziltat persun uj paaz pecni kuzcama kamčhaja, jalla niiqui persun pinsitanacžquizkaz kuz tjaača. Pero jakziltat Espíritu Santuž kuzcama kamčhaja, jalla niiqui Yooz Espíritu Santuž pinsitanacžquiz kuz tjaača.

⁶ Jakziltat uj paaz pecni kuz pinsitanacžquiz kuz tjaačhaj niiqui, Yooziz wiñaya castictaž cjequiča. Pero jakziltat Espíritu Santuž pinsitanacžquiz kuz tjaačhaj niiqui, Yooz kamañchiz kamaquiča, nižaza Yooztan nižtan walikaz cjequiča.

⁷ Jakziltat persun anazum kuzcamakaz kamz pecčhaja, jalla niiqui Yooz quintrača. Yooz kuzcama anapanž kamz pecča, nižaza anapanž

atčha.

⁸ Jakziltat persun kuzcamakaz kamz pecčhaja, jalla nuž kantiquiztan Yoozqui anapančha cuntintu.

⁹ Ančhuczti persun kuzcamakaz anaž kamčha. Yooz Espíritu Santuž ančhuca kuznacquiz žejlchiž cjen, ančhucqui Espíritu Santuž kuzcama kamčha. Jakziltat ana Jesucristuž Espirituchizlaja, anačha Jesucristuž partichiz žoñiqui.

¹⁰ Jesucristuž ančhuca kuznacquiz žejlchiž cjen Yooz yujcquiz ana ujchizčhucčha, nizaza zuma kuzzizčhucčha. Nižaza ančhuca animunacaqui ew zuma kamañchizza. Uj paachiž cjen ančhuca curpunacaqui ticznaquičha. Jalla nuž cjenami ančhuca animunacaqui Yooztan wiñaya kamčha.

¹¹ Yooz Ejpqui niž Espíritu Santuž cjen Jesucristo ticziquiztan jacatatskatchičha. Nii Yooz Espíritu Santuqui ančhuca kuzquiz žejlčha. Jalla nižtiquiztan Yooz Ejpqui niž Espíritu Santuž cjen ančhuca ticzi curpunaca zakaz jacatatskataquičha.

¹² Jilanaca, cullaquinaca, tsjii mantuquiz kamspančha učhumqui. Anačha uj paaz pecñi kuz mantuquiz kamzqui, persun kuzcamakaz paazjapa. Pero Yooz Espíritu Santuž mantuquiz kamsa.

¹³ Jakziltat persun kuzcamakaz kamchiž cječhaja, jalla niiqui Yooziž wiñaya castictaž cjequičha. Pero jakziltat Espíritu Santuž mantuquiz žejlčhaja, jalla niiqui uj paaznaca jaytičha. Jalla nuž ujnaca jaytichiž cjen, Yooz kamañchiz kamaquičha.

14 Jakziltat Yooz Espíritu Santuž irpita cječhaja, jalla niiqui Yooz maatiča.

15 Ančhucqui Yooz maatinacčhucča. Jaziqui Espíritu Santuqui ančuca kuznacquiz luzziž cjen, ana Yoozquiztan eksñi kuzzizza. Espíritu Santuž cjen, “Učhum Yooz Tata”,

16 jalla nuž cjican učhum kuznacaqui chiiča. Nižaza kuzquiz sint'iskatča, učhumča Yooz maatinacaqui, jalla nii.

17 Nižaza Yooz maatinacaž cjen Yooziž tjaata zuma irinsa tanznaquiča, jalla nii irinsača Yooztan wiñaya kamzqui, Jesucristužtan chica. Tii muntuquiz kamcan Jesucristuqui sufrichiča. Učhumqui Jesucristužquiz sirwichiž cjen zakaz sufraquiž niiqui, nekztan arajpachquin nižtan chica honorchiz cjequiča.

18 Tii timpuquiz sufrisnacaqui anača anča. Cjuñzna, Yooziž tjaata honorača anča zuma. Jalla nuž cjuñznuča wejrqui. Jesucristuž tjonz tjuñquiziqui učumnacaqui zuma honorchiz cjequiča. Jalla nii tjeežtaž cjequiča.

19 Tjapa tii muntuquiz žejlñinacaqui ančaž tjewža, Yooz maatinacž honora tjeez tjuñi.

20 Adanž uj paatiquiztan tjapa tii muntuquiz čhjultakimi inakaz cjissiča. Yooz munan jalla nuž cjissiča. Anača juyztokaz inakaz cjissiča. Pero tsjii noojiqui tii muntumi tii muntuquiz žejlñinacami anawalinacquiztan liwriitaž cjequiča. Jalla nii tjuñi tjewža.

21 Jalla nii noojiqui tii muntumi tii muntuquiz žejlñinacami tjapa ana walinacquiztanami liwriitaž cjequiča. Ticzmi anawali watñinacami ana želaquiča. Liwriitiquiztan tii muntumi tii

muntuquiz žejlñinacami liwj zumacama cjiskattaž cjequiča, jaknužt Yooz maatinacaqui zumapan cjiskattaž cječhaja, jalla nižta irata.

²² Adanž timpuquiztanpacha tii timpucama tjapa tii muntuquiz žejlñinacaqui sufriča jaknužt tsjaa ic maataka majtz ora sufričhaja, jalla nižta ancha ayincan žejlča.

²³ Učhum kuzquiz zakaz ancha sufriča, Espíritu Santuchiz cjenami. Nii Espíritu Santuqui tsjii zuma adelanto učhum kuzquiz žejlča. Jalla nuž cjen učhumqui ancha tjewža, juc'ant tsjan zuma kamañchiz cjisjapa. Učhumqui Yooz maatinacaž cjitiquiztan nii zuma kamañchiz cjisnaquiča. Nižaza učhum Yooz maatinaca cjican, ew curpuchiz cjisnaquiča.

²⁴ Jalla nuž učhumnacaqui tjewža liwriitaž cjen. Chjulunacat chertčhaja, jalla nii chertanaca ana tjewžta cjequiča. ¿Jec žoñit chertanaca tjewz-nasajo?

²⁵ Učhumnacaqui ana chertanaca tjewža. Yoozquiztan tjonñi zumanaca tjewža. Jalla nižtiquiztan pasinziz kuztan tjewstanča.

²⁶ Jaknužt učhum zuma tjewzqui sufris awantizjapa yanapčhaja, jalla nižta irata Yooz Espíritu Santuqui učhum yanapča tjurt'iñi kuzziz cjisjapa. Učhumqui Yoozquiztan jaknužt mayiziz waquizičhaja, ana zizza. Jalla nižtiquiztan Yooz Espíritu Santupacha učhumnacalta ancha mayizinñičha, nižaza niipachaž ancha sint'ičha učhumnacalta. Nii Espíritu Santuž mayizintaqui žoñž tawkžtan ana chiita cjesača.

²⁷ Espíritu Santuqui criichi žoñinacžta mayizinñičha Yooz Ejpž kuzcamakaz. Jalla

nuž mayižinan kuzquiz zizñi Yooz Ejpqui nii Espíritu Santuž kuzquiz pinsitanaca zizza. Jalla nižtiquiztan Yooz Ejpqui Yooz Espíritu Santuž učumnacalta mayižintanaca zizza.

YOOZ EJPQUI NIIŽ MAATINACZTAN ANCHA MUNAZIČHA

²⁸ Yoozqui niiž pinsitacama žoñinaca kjawzičha, niiž maati cjskatajo. Jalla nii kjawžta žoñinacaqui Yooztan zuma munazičha. Jalla nii munazita žoñinacžta Yoozqui čhjulu cjenami mantičha ni-nacžta zuma cjisjapa. Učhumqui nii zizza.

²⁹ Yoozqui tuquitanpacha zizzičha, jecnacat niiž maatinaca cjisnačhaja, jalla nii. Nižaza tuquitanpacha Yoozqui niiž maatinaca utchičha, niiž zinta Majch irata cjisjapa, jalla nižta zuma cjisjapa. Jalla nuž Yoozqui pinsichičha, niiž zinta Majchqui jilir jila cjisjapa, tjapa Yoozquin criichi žoñinacžquiztan juc'ant honorchiz cjisjapa.

³⁰ Yooz Ejpqui jecnacat niiž maatinaca cjisnačhaja, nii pinsichičha. Ninaca kjawzizakazza. Nižaza Yoozqui jecnacat kjawztčhaja, jalla ninaca ana ujchiz cjiskatčha. Nižaza Yoozqui jecnacat ana ujchiz cjistčhaja, jalla ninaca juc'ant zuma kamañchiz cjiskatčha.

³¹ Tjapa nii puntuquiztan učhumqui, ¿kjaž iya cjequejo? Yoozqui učumnacaltajapapančha. Jalla nižtiquiztan ¿ject učhum atipasajo? Anaž čhjulumi.

³² Yoozqui niiž zinta Majch ana chjojchičha, antiz učumnacaltajapa utchičha, učhum laycu ticzjapa. Jalla nuž niiž zinta Majch utchiž cjen

učumnacaquiz tjapa niž zumanaca zakaz tjaaquiča, juc'ant zuma kamañchiz kamajo.

³³ Nižaza Yooz illzta žoñinacžjapa anaž jecmi uj tjojtñasacha. Yoozpacha ninaca ana ujchiz cjiskatchiča.

³⁴ Jalla nižtiquiztan ¿ject Yooz illzta žoñinacžquiz “Casticta cjistanča” cjican chiyasajo? Anaž jecmi. Jesucristučha ninacž laycu ticziqui. Nekztan ticziquiztan jacatatchiča. Anziqui Yooz Ejpž žew kjarquiz žejlča, tjapa mantican. Jalla nii Jesucristupachača učumnacalta tjurt'ižinñiqui.

³⁵ Čjulunacaž watanami Jesucristuqui učumnacatan munaziča: sufris watanami, llaquinaca watanami, chjaawjkatñi watanami, mach'a watanami, ana zquiti žejlž watanami, ana waliž tjonanami, ana wali ticz watanami, čjulunacaž watanami Jesucristuqui učumnacatan munaziča.

³⁶ Cjijrta Yooz takuqui tuž cjiča:

“Yooz partiquiz žejlčiž cjen učumnacaqui sufrican sufrican zapuru ticzmayažtakaz žejlča. Učum quintra žoñinacaqui tantiiča, criichi žoñinacaž contaj cjila, cjican. Konz uuzanacažtakaz učumnacaquiz nayča”.

³⁷ Pero čjulunacaž watanami Jesucristuqui učumnacatan panž munaziča. Nižaza čjulunacaž watanami učumnacaqui Jesucristuž cjen tjapa nii anawalinacžquiztan atipaquiča.

³⁸ Anaž čjulumi Yooz učumnacatan ana munazizkati atasacha: anaž ticzmi, anaž žetimi, anaž anjilanacami, anaž mantinñinacami, anaž poder-

chiznacami, anaž anztan žejlñinacami, anaž jaztan žejlñinacami,

³⁹ anaž tsewcta poderanacami, anaž tii yokquiz žejlñi poderanacami, anaž čjul paatanacami Yooz učumnacatan ana munazizkati atasacha. Yoozqui učumnacatan panž munaziča, učumnacatan Jesucristo Jiliržtan tsjii kuzziz cjen.

9

JUDIO WAJTCHIZ ŽOÑINACA

¹ Tsjilla cjesacha. Jalla tii puntuquiztan wejrqui zuma razunapal cjiwča. Jesucristužquiz kuzziz cjen razunal chiyuča, anal toscara chiyuča. Espíritu Santuqui wejt kuz zizza. Lijituma cjiwča.

² Ancha llaquizuča, nižaza wejt kuzquiz anchal cjuñznuča wejt judío wajtchiz žoñinacžquiz.

³ Wejt judío žoñinacaqui Jesucristuž partiquiz cjiskattasaž niiqui, wejrqui Jesucristužquiztan t'akžtacama cjis pectasacha. Nižaza wejrqui ninacž laycu infernuquin castictacama cjitasacha. Ninacaqui wejt parti žoñinacača.

⁴ Israel majchmaatinacquiztan tjonchiž cjen, ninacaqui Yooz illzta žoñinacača. Yoozqui judío žoñinacžquiz persun honora tjeeziča. Nižaza Yoozqui judío žoñinacžtan acuerdunacquiz luzziča. Nižaza Yoozqui Moisesquiz lii tjaachiča ninacžtajapa. Nižaza Yoozqui, jaknužt nižquiz sirwiz waquizičhaja, jalla nii cuzturumpinaca ninacžquiz tjaachiča. Nižaza tuqui timpuquiz Yoozqui ninacžquiz takunaca

tjaachiĉha, jaztanaqui tsjii Liwriiñi tjonaquiĉha, nii.

⁵ Uĉhum judío Źoñinacž tuquita atchi ejpnacaqui Yooziž illztataĉha. Jaziqui uĉhum judío Źoñinacž majchmaatinacquiztan tjonñitaĉha Cristuqui. Nekztan Źoñž curpuchiz cjissiĉha. Cristuĉha tjapa mantiñi Yoozpachaqui. Nižaza wiñaya honorchiz cjila. Nužoj cjila. Amén.

⁶ Tjapa Israel cjita tuquita ejpž majchmaatinacaqui anaĉha ultim lijitum Israel wajtchiz Źoñinaca, nižaza anaĉha Yooz wajtchiz Źoñinaca. Tjapa judío Źoñinacami ana Yooz maatinacaž cjenami, Yooz takuqui cumplissiĉha.

⁷ Nižaza tjapa Abrahamž majchmaatinacaqui anaĉha ultim lijitum Abrahamž familiaqui. Cjijrta Yooz takuqui Abrahamž puntuquiztan tuž cjiĉha: “Am ultim majchmaatinacaqui am majch Isaacžquiztan okaquiĉha”.

⁸⁻⁹ Jaziqui wejrqui cjiwĉha, tjapa Abrahamžquiztan ojĉñi majchmaatinacaqui anaĉha ultimu Yooz maatinaca, nii. Yoozqui Abrahamžquiz taku tjachiĉha, tuž cjican: “Weriž chiita timpuquiz quejpžcaĉha, wejt taku cumplizjapa. Jalla nii weriž quejpžquizcama am Sara cjiti tjunqui tsjii majch mataquiĉha”. Nekztan Abrahamqui nii taku catokĉiĉha. Nižaza Yoozqui tjapa nižž taku catokñi Źoñinacžquiz nayĉha, ninacaqui ultim lijituma Abrahamž majchmaatinacaĉha, nii.

¹⁰ Tsjilla cjesaĉha nii puntuquiztan. Uĉhum Isaac tuquita atchi ejpqui Rebeca cjiti tjunchizza. Nii lucutiñiqui pucultan majchnacchiztaĉha.

11-13 Nii pucultan ocjalaž ima matan, nižaza ima zuma ana zuma paan, Yoozqui Rebecaquiz cjichiča, tuž cjican: “Am jilir majchqui niž majchmaatinacžtanpacha niž lajkžquiz piyunanaca cjequiča niž lajkž majchmaatinacžquizpacha”. Nižaza cijirta Yooz takuqui tuž cjiča: “Jacob pecchinča. Esau ana pecchinča”. Jaknužt Yooz pinsitčhaja, jalla nuž illziča. Paatanacquiztan jama ana illziča Yoozqui. Pero niž pectacama illziča, nižaza kjawziča niž partiquiz cjisjapa.

14 Jalla nii puntuquiztan ¿kjaž iya cjequejo? ¿Yooz ana lijituma paajo? Anaž cjesača. Yoozqui lijituma panž paača.

15 Yoozqui Moisesquiz cjichiča, tuž cjican: “Wejt munañpacama wejt okzñi kuz tjeeznuča, nižaza wejt munañpacama favora paaznuča”.

16 Ana žoñž munañpacama, nižaza ana žoñiž langžtacama Yoozqui okža. Pero Yoozqui persun kuz munañpacama okža.

17 Cjirta Yooz takuqui tuž cjiča: Yoozqui Egipto nación chawc jiliržquiz cjichiča: “Wejrqui am utchinča chawc jiliri cjisjapa. Jalla nuž am utchinča, am quintra wejt azi tjeezjapa, nižaza tjapa tii žoñinacžquiz weriž paata quintu mazta cjisjapa”. Jalla nuž cjichiča Yoozqui.

18 Yoozqui persun kuz munañpacama okža, nižaza persun kuz munañpacama žoñinacž kuz chojruzakaz cjiskatča. Jalla nižta kjanapachača.

19 Cunamit tsjiiqui cječhani, tuž cjican:

—Jalla nižta cjen, ¿kjažtiquiztan Yoozqui žoñinacž ujquiztan casticaquejo? ¿Jec žoñit Yooz pinsita quintra kamasajo?

²⁰ Jalla nižta chiiñizquiz pewcznača, ¿ject amjo Yooz quintra ch'aazjapajo? ¿Tsjii ojchqui niž paañizquiz chuchasajo, “¿Kjažtiquiztan wejr nižta paajo?” cjicanajo?

²¹ Tsjii ojch paañiqui čhjulumi paasača ljocquiztanaqui. Ljocquiztan paasača tsjii ancha c'achja ojchlla pjijztanacžquiz joojoota cjisjapa. Nižaza ana zuma cheechi ojch paasača, zapuru joojoota cjisjapa.

²² Jalla nižta iratača Yoozqui. Yoozqui tsjii žoñinaca utchiča, casticta cjisjapa. Jalla nuž utchiča, niž azi tjeezjapa, nižaza niž uj quintra žawjz tjeezjapa. Jalla nuž tjeezñi peccanami Yoozqui pasinziz kuztan nii ana wal žoñinaca awantiča, casticz tjuñicama.

²³ Nižaza Yoozqui yekjap žoñinaca utchiča, niž okžta cjisjapa. Tuquitanpacha nii žoñinaca tjaczicha, arajpachquin zuma honorchiz cjisjapa. Nižaza Yoozqui nii žoñinacžtan okžñi kuztan žejlča, niž juc'ant okžñi kuz tjeezjapa.

²⁴ Učhum zakaz Yoozqui kjawziča, niž okžta žoñinaca cjisjapa. Judío wajtchiz žoñinacami ana judío wajtchiz žoñinacami, tjapa učhumqui Yooz okžta žoñinacčhumča.

²⁵ Jalla nii puntuzakaz Yoozqui Oseas cijjrta liwruquiz tuž cjiča:

“Ana Yooziž illzta žoñinacaqui Yooziž illzta žoñinaca cjequiča. Nižaza tuqui ana pecta žoñinacaqui anziqui Yooziž pecta cjequiča”.

²⁶ Nižaza tuquiqui judío žoñinacaqui cjichiča: “Ančhucča anaž Yooz wajtchiz žoñinacaqui”. Pero

tii timpuquiz nii iñarta žoñinacaqui “zejtñi Yooz maatinacaž cjequiča”.

²⁷ Israel žoñinacz puntuquiztan Isaías profetaqui tuž cjichiča: “Israelž majchmaatinacaqui ancha tama želaquiča, kot at pjilažtakaz, jalla nižta miraquiča. Jalla nuž mirchi cjenami, tsjii kjaž žoñinacakaz liwriitaž cjequiča.

²⁸ Yooz Jiliriqui tii muntuquiz žejlñi žoñinaczquiz niž chiita taku cumplaquiča, panž apura cumplaquiča”.

²⁹ Jalla nii puntuzakaz Isaías profetaqui maz-inchiča tuž cjican:

“Walja azziz Yooz Jiliriqui tsjii učum majchmaatinaca ana liwriitasaz niiqui, tjappacha ticztasača Sodoma wajtchiz žoñinacažtakaz, nižaza Gomorra wajtchiz žoñinacažtakaz”.

JUDIO ŽOÑINACAQUI UJQUIZ TJOJ TSA

³⁰ ¿Kjaž cjequejo nekztanajo? Tuquiqui ana judío žoñinacaqui ana importichiča Yooz yujcquiz ana ujchiz cjisjapa. Jaziqui Jesucristužquin kuz tjaachiž cjen Yooz yujcquiz ana ujchiz cjissiča.

³¹ Nižaza judío žoñinacaqui Moisés lii jaru kamz pecatča, Yooz yujcquiz ana ujchiz cjisjapa. Pero nii lii jaru ana zumpacha kami atchiča.

³² ¿Kjažtiquiztan Yooz yujcquiz ana ujchiz cjisñi atatjo? Ninaca persunpacha lii jaru kamtiquiztan Yooz yujcquiz zuma cjis pecchiča. Pero ana atchiča. Nižaza nii lii jaru kamz peccan, juc'ant ujchiz cjissiča, Jesucristužquin ana kuz tjaachiž cjen. Jaknužt tsjii mazquiz tejžcu tjojtsaja, jalla nižta irata Jesucristužquiztan ujquiz tjojtsiča.

³³ Jalla nužpacha cjiŕta Yooz takuqui cjiča:

“Zoñinaca nonžna; wejrqui Sión cjita wajtquiz tsjii utča. Jalla nižquiztan zoñinaca ujquiz tjojtsnaquiča. Tsjii maztakaz nižquiztan zoñinaca t'eznaquiča. Pero jakziltat nižquiz kuz tjaačhaja, jalla niiqui ana inakaz kuz tjaaquiča. Ana incallta cjequiča”.

10

¹ Jilanaca, cullaquinaca, judío zoñinaca liwri-itaj cjila, jalla nužuča weriž kuzquiz pectaqui. Nižaza jalla nužuča weriž Yoozquin mayiztaqui.

² Ninacž puntuquiztan wejrqui ticlarača, ninacaqui Yooz sirwiz pecča, nii. Pero Yooz sirwiz puntu ana zuma intintazza.

³ Jaknužt Yoozqui zoñinaca ana ujchiz, nižaza zuma cjiskatčhaja, jalla nii Yooz pinsita ana zizza. Ninacaqui persun kuzquiz pinsitacamakaz Yooz yujcquiz zuma cjis pecča. Jalla nižtiquiztan Yooz pinsitiquiz ana importichiča; nižaza Yooz taku ana nonža.

⁴ Jesucristuqui Moisés lii nužquiz apatatskatchiča. Jaziqi jakziltat Jesucristužquiz kuz tjaačhaja, jalla niikaz Yooz yujcquiz zuma cjisnaquiča, ana ujchiz.

⁵ Yooz yujcquiz zuma cjis puntuquiztan Moisesqui tuž cjiŕchiča: “Jakziltat wejt lii jaru kamčhaja, jalla niiqui Yooztan kamaquiča, lii jaru kamčiž cjen”. Pero zoñinacaqui nuž kami anapan atča.

⁶ Jaziqui Jesucristužquiz kuz tjaachiž cjenkaz Yooz yujcquiz zuma cjesača. Jalla nii puntuquiz-tan tužuča. Ančuca kuzquiz ana pinsaquiča, tuž cjican: “¿Ject arajpacha yawasay?” (Jalla nuž cjican, Jesucristo chjijwkatz pecča.) Ana čjul žoñimi nižta paasača.

⁷ Nižaza ančuca kuzquiz ana pinsaquiča, tuž cjican: “¿Ject ticzi žoñinacžquin okaqui?” (Jalla nuž cjican, Jesucristo ticziquiztan jacatatskatz pecča.) Ana čjul žoñimi nižta paasača.

⁸ Pero čjul žoñimi Yoozquin kuz tjaachiž cjen Yooz yujcquiz zuma cjisnasača. Yooz yujcquiz zuma cjisqui jalla tužuča. Liwriiñi taku ančucalta žejlča, Yoozquin kuzziz cjisjapa. Nii taku ančuca atžtan parlasača, nižaza ančuca kuztan catokasača. Jalla nii liwriiñi takuqui tužuča: Jesucristužquiz kuz tjaaquiž niiqui, liwriita cjequiča, nii. Jalla niipacha wejrnacqui paljayuča.

⁹ Ančucqui ticlarstanča, Jiliripanča Jesucristuqui, cjicanaqui. Nižaza ančuca kuzquiz criistanča, Yoozqui Jesucristo ticziquiztan jacatatchiča, jalla nii. Jalla nekztan liwriita cjequiča.

¹⁰ Žoñinacaqui tjapa kuztan criistanča, nekztan Yooz yujcquiz zuma cjequiča, ana ujchiz. Nižaza persun tawkžtan “Jesucristužquiz kuz tjaa-uča” cjican ticlarstanča, nekztan liwriita cjequiča.

¹¹ Cjijrta Yooz takuqui tuž cjiča: “Jakziltat Yoozquin kuz tjaačhaja, jalla niiqui ana inakaz kuz tjaaquiča”.

¹² Judío žoñinacžtanami yekja wajtchiz žoñinacžtanami Yooz yujcquiziqui tsjii

parijukazza. Yooz Jiliriča tjapa žoñinacžta Jiliričui. Jakziltat liwriita cjisjapa Yoozquiz mayizičhaja, jalla nižquiz Yoozqui okznaquičha; nižaza liwriyaquičha.

¹³ Jalla nužpacha cijjrta Yooz takuqui cjiča: “Jakziltat Yooz Jiliržquiz mayizičhaja, jalla niiqui liwriita cjequičha”.

¹⁴ Pero žoñinacaqui Yoozquin ana criyaquič ni-iqui, ¿kjažt nii žoñinacaqui Yoozquin mayizasajo? Nižaza Yooz puntuquiztan ana nonzitažlaj niiqui, ¿kjažt Yoozquiz criyasajo? Nižaza Yooz puntu paljayni žoñi ana želaquič niiqui, ¿kjažt nonžni cjesajo?

¹⁵ Nižaza Yooz puntu paljayni žoñinaca ana cuchanžquitažlaj niiqui, ¿kjažt Yooz puntu paljayta cjesajo? Cijjrta Yooz takuqui tuž cjiča: “Ancha zumača Yooz puntu paljayni žoñinacaqui. Paljayta Yooz taku catokžcu, Yooztan žoñinacžtan wali cjiskatasacha”.

¹⁶ Pero wacchi žoñinacaqui paljayta Yooz taku ana juyzu paača. Jalla nužupan Isaiasqui cjichiča: “Yooz Jiliri, ¿ject wejrnacž paljayta takunaca criijo? Tsjii kjažukazza criichi”.

¹⁷ Jaziqui Jesucristuž puntu paljaytažlaja, nii puntu nonžta cjesača. Nižaza Jesucristuž puntu nonžcu, žoñinacaqui nižquin kuz tjaasača.

¹⁸ Wejr pewcznuča, ¿Judío žoñinacaqui ana nonzejo? Nonzipanča. Yooz takuqui cjiča:

“Tjapa kjutni tii yokchiz žoñinacžquiziqui nii liwriini taku mazmaztača. Nižaza tjapa tii muntuquiz žejlni žoñinacaqui nii taku nonža”.

19 Tsjiiztan wilta pewcznuča, ¿Israel wajtchiz žoñinacaqui ana intintazzikaya? Tuquiqui judío žoñinacž puntuquiztan Moisesqui cjichiča:

“Yoozqui ančhucaquiz iñiziskataquiča, yekja wajtchiz žoñinacžquiztan. Nižaza Yoozqui ančhucaquiz žawjkataquiča tuquita ana Yooz pajni wajtchiz žoñinacžquiztan”.

20 Nekztanaqui Isaiasqui ana ekscu, tuž chichiča:

“Ana werar Yooz pecñinacaqui ultimquiziqui Yooz pajchiča. Nižaza Yoozqui persunpacha tjeeziča tuquita ana nižquiz pecñinacžquiz”.

21 Yooz Ejpqui Israel wajtchiz žoñinacž puntuquiztan tuž cjiča:

“Zita zita wejrqui ančhuc kjawznatuča wejtquin tjonajo. Ančhuczti anaž wejt kjawžta cazza, antiz wejt quintrakazza”.

11

CRIICHI JUDIO ŽOÑINACA ZEJLCHA

1 Jalla nižtiquiztan wejrqui pewcznuča, ¿Yoozqui niž tuquita illzta žoñinaca chjatkatjo? Anapanž cjesača. Wejrpacha Israel wajtchiztča, Abrahamž majchmaatitča, nižaza Benjaminž parti žoñtča.

2 Tuquitanpacha Yoozqui Israel žoñinaca ilziča. Jalla nižtiquiztan anaž chjatkatasacha. ¿Jalla Elías puntuquiztan ana cjuñjo? Elías puntuquiztan cijirta Yooz takuqui tuž cjiča: Eliasqui Israel žoñinacž ujnaca Yoozquiz tjeeziča, tuž cijican:

³ “Yooz Jiliri, ninacaqui amiž cuchanzquita profetanaca conchiča. Nižaza am sirwiz altaranaca pajlchiča. Wejrqui am sirwiñi zinalla želuča. Ninacaqui wejr zakaz konz pecča”. Jalla nuž cjichiča Eliasqui.

⁴ Nekztan Yoozqui Eliasquiz tuž kjaaziča: “Wejtajapa pakallawk warank žoñinaca čhjetzinča. Ninacaqui Baal cjita žoñiž paata yooz yujcquiz anapan quillziča”.

⁵ Jalla nižta irata tii timpuquiz zakaz tsjii kjaž judío žoñinacaqui Yooz partiquiz žejlča. Yoozqui ninacžquiz okžcu, illziča.

⁶ Nii criichi judío žoñinacaqui Yooziž okziž cjenkaz illztača. Jalla nižtiquiztan ana ninacaž kamtiquiztan illztača. Ninacaž kamtiquiztan illzta cjitasaž niiqui, Yooz okzqui inakaz cjitasača.

⁷ ¿Jazic kjaž cjii? Israel wajtchiz žoñinacaqui ujquiztan liwriita cjis pecatča. Pero ana liwritatača. Yooziž illztanacaqui ninaca alajakaz liwriitača. Parti Israel žoñinacazti chojru kuzziz cjissiča.

⁸ Jalla nii chojru kuzziz žoñinacž puntuquiztan cijrta Yooz takuqui tuž cjiča:

“Yoozqui Israel žoñinacžquiz niiž puntu ana intintiñi kuzziz cjiskatchiča. Jalla nižtiquiztan ninacaqui Yooz puntu chercanpacha ana chernižtakaz cjiskatchiča, nižaza Yooz puntu nonzcanpacha ana nonžnižtakaz cjiskatchiča. Anzta tii timpucamaž nižta žejlča”.

9 Nižaza Davidqui Yooz tawk liwruquiz tuž cji-rchiča:

“Yoozquin ana kuzziz žoñinaca žejlča. Yooziž tjaatanacaqui ninacžquiz ujquiz tjojtskatla. Tsjii trampažtakaz cjila, ujquiz tjojtskatzjapa. Nižaza ninaca t'ezinla, ninacž uj paatiquiztan jama casticta cjisjapa.

10 Zur žoñinacažtakaz žejlcan Yooz puntu ana cherñi cjila. Nižaza ninacž tajqui chutunzižtakaz cjila, ana walinacaž tjonchiž cjen”.

YEKJA WAJTCHIZ ŽOÑINACŽ PUNTU

11 Jalla nižtiquiztan wejrqui pewcznuča, Israel wajtchiz žoñinacaqui ujquiz tjojtsiž cjen, ¿wiñaya chjatkatta cjesajo? Anapanž cjesača. Israel wajtchiz žoñinacaž liwriiñi tawkquiz ana juyzu paachiž cjen, nii liwriiñi takuqui yekja wajtchiz žoñinacžquiz paljaytača, Israel žoñinacžquiz p'ekinchayzjapa, Yoozquin kuz tjajajo.

12 Israel žoñinacaž liwriiñi taku ana juyzu paachiž cjen parti žoñinacžtajapa zuma cjissiča. Nižaza ninacaž Yoozquiztan jaytitiquiztan yekja wajtchiz žoñinacžtajapa wali cjissiča. Jalla nižtiquiztan Israel žoñinaca wilta Yooz partiquiz cjisnan tsjan juc'ant zumaž cjisnaquiča yekja wajtchiz žoñinacžtajapa.

13 Anziqui ančhuc yekja wajtchiz žoñinacžquiz chiyuča. Wejrqui yekja wajtchiz žoñinacžquiz cuchanžquita apostoltča. Jalla nižtiquiztan wejt apóstol kamaña anchal importayuča,

14 wejt judío sarchiz žoñinaca p'ekinchayzjapa, nižaza tsjii kjažu liwriita cjisjapa.

15 Judío žoňinacaž chjatkattaž cjen yekja wajtchiz žoňinacaqui pertunta cjissiča, Yooztan wali cjisjapa. Jalla nižtiquiztan nii judío žoňinacaž wilta Yooz partiquiz risiwta cjis cjen, žoňinacaqui ticziquiztan jacatatchi cjisnaquiča.

16 Judío žoňinacž tuquita atchi ejpnacaqui Yooz partiquiz želatča. Jalla nižtiquiztan tsjii tjonňi timpuquiz judío žoňinacaqui Yooz partiquiz wilta cjisnaquiča. Jaknužt primir paata t'antaqui zumažlaja, jalla nekztan tjapa nii t'anti mazaqui zuma zakazza. Nižaza tsjii munti sep'aqui zumažlaj niiqui, nii tsijtňi muntiqui zuma zakazza.

17 Tsjii judío žoňinacaqui munti itzanacažtakaz ts'ojrtača. Nižaza ančhuc yekja wajtchiz žoňinacaqui tsjii ana pecta munti itzažtakazza. Pero ančhucqui judío žoňinacž cjenpacha apjattača, nii zuma muntiž cjen wali zakaz cjejajo. Nii zuma muntiqui Yooz partiča.

18 Ančhucqui jalla nuž apjattiquiztan, anaž judío žoňinaca iňaraquiča. Jakziltat iňaračhaja, jalla niiqui tuž cjuňž waquiziča, ančhucqui nii sep'až cjen žetiňčhucča. Ana ančucaž cjen nii sep'a žejtča. Nii sep'ača judío žoňinacaqui. Cristučha tsjii judío žoňiqui. Jalla niiž cjen ančhucqui ew žeti tanzinčhucča.

19 Yekjapanacaqui cunamit cječhani, “Nii it-sanacaqui ts'ojrtača wejrnaca apjatžta cjisjapa”.

20 Razunaž niiqui. Ana Yoozquin kuz tjaachiž cjen judío žoňinacaqui chjatkattača. Ančhuczi Yoozquin kuz tjaachiž cjen jalla nii alajakaz Yooz partiquiz žejlča. Jalla nižtiquiztan anača mitarazi kuzziz cjeella. Antiz humilde kuzziz cjee, Yooz rispitan.

²¹ Yoozqui ana kuz tjaañi judío žoñinacžjapa quintra cjišsižlaj niiqui, ančhucajapa zakaz quintra cjisnaquiča ana nižquiz kuzzizlaj niiqui.

²² Yoozza okžñimi nižaza casticñimi, jalla niž tantiya. Yoozquiztan zarakñi žoñinacžjapa casticñipanča. Nižaza nižquin kuz tjaañinacžjapa okžñipanča. Ančhucqui tira Yoozquin kuzzizlaj niiqui, nekztan Yoozqui ančhuc tira okznaquiča. Ančhucqui ana tira Yoozquin kuzzizlaj niiqui, nekztan Yoozqui ančhucquiz zakaz chjatkataquiča.

²³ Nii chjatkatta judío žoñinacaqui wilta Yoozquin kuz tjaaquiž niiqui, wilta Yoozqui ninaca ricujaquiča. Yoozqui ricujzmi atča, Yooz partiquiz cjisjapa.

²⁴ Ančhucqui yekja wajtchiz žoñinacača, ana pecta munti itzanacažtakaz. Ana Yooz partiquiz želan Yoozqui ančhuc niž partiquiz apjatchičha, yekja wajtchiz žoñinacaž cjenami. Jalla nižta watan, judío žoñinacaqui Yooz partiquiz wilta apjatžqui tsjan pjasilača, tuquiqui Yooz partiquiz žejlchiž cjen.

JUDIO ŽOÑINACAQUI YOOZQUIN KUZ TJAAQUICHA

²⁵ Jilanaca, cullaquinaca, tsjii tuquita ana zizta taku ančhucquiz zizkatz pecučha, ana mitaraz kuzziz cjisjapa, “Wejrnacqui ziziñ žoñtča” cjicanaqui. Jalla tuž zizkatz pecučha: Yoozqui yekja wajtchiz žoñinacžquiz niž partiquiz cjiskatz pecčha. Jakziltanacžquiz Yoozqui niž partiquiz lužkatz pecčhaja, jalla ninacaqui luzaquiča. Tjapa nii Yooziž pecta žoñinaca Yooz partiquiz

luzcama, jalla niicama Israel žoñinacaqui chojru ana intintiñi kuzziz cjequiča.

²⁶ Jalla nekztanaqui tjapa nii timpuquiz žejlñi Israel žoñinacaqui liwriita cjequiča. Jalla nuž cijjrta Yooz takuqui cjiča:

“Sión wajtquiztan tsjii Liwriiñiqui tjonaquiča. Jacobž majchmaatinacquiztan ana zum kamañanaca jajtiskataquiča.

²⁷ Jalla nekztanaqui wejrqui ninacžtan compromitača, ninacž ujnaca pertunača, nii”.

²⁸ Tii timpuquiziqui Israel žoñinacaqui Yooz liwriiñi tawk quintrača, nižaza Yooz quintrača, ančhucalta wali cjisjapa. Jalla ninaca Yooz quintraž cjenami Yoozqui ninacžtan munaziča, ninacž tuquita atchi ejpnaca illziž cjen.

²⁹ Yoozqui tjaacanpacha anaž niž tjaataqui kjañasača. Nižaza Yoozqui illžcupacha, ana chatkatasača.

³⁰ Tuquiqui ančhucqui Yooz ana cazziñčucča. Anziqui ančhucqui Yooziž pertuntača, ninacaž ana Yooz caziž cjen.

³¹ Tii timpuquiziqui Israel žoñinacaqui Yooz ana cazza. Jalla nuž cjenami tii jarquin ninacaqui Yooziž pertuntaž cjequiča, jaknužt ančhucqui pertunta cjistčhaja, jalla nižta. Jalla nižta Yoozqui niž okzñi kuz tjeznaquiča.

³² Yoozqui tsjii parijsu tjapa žoñinacž ujnaca tjeziča, nižquiz ana cazta, jalla nii. Jalla nuž tjeziča tjapa žoñinacžquiz tsjii parijsu niž okzñi kuz tjezjapa.

³³ ¡Ancha juc'anti zumača Yoozqui! Ancha zuma pinsitanacchizza. Nižaza Yoozqui tjapa intintazza. Nižaza Yooziž pinsitanaca anaž jecmi

zuma intintasača. Yooz pjalan anaž jecmi nižquiz mitisasača.

³⁴ ¿Ject Yooz Jilirž pinsitanaca intintasajo? ¿Ject Yooz Jiliržquiz tjaajnasajo?

³⁵ ¿Ject Yooz Jiliržquiz ayñi cjisjapa tjaasajo? Anaž jecmi.

³⁶ Tjapa Yoozquiztan tjonča. Nižaza tjapa niž cjen žejlča. Nižaza tjapa nižtacamača. Yoozqui wiñaya honorchiz cjila. Jalla nužoj cjila. Amén.

12

YOOZ KUZCAMA KAMZ PUNTU

¹ Jilanaca, cullaquinaca, Yooz ančhuc okziž cjen ančhucaquiz chiižinuča, ančuca persun curpu Yoozquin tjaa, tsjii žejtñi wilanažtakaz. Ančuca persun curpu Yooztajapakaz cjee, ana zinta uj paacan. Nuž cjen Yoozqui cuntintuž cjequiča. Jalla nižtača Yooz ultim lijituma sirwizqui.

² Jaknužt tii muntuquiz ana criichi žoñinaca kamčhaja, jalla nižta ančhucqui ana kama. Antiz ančhucaz pinsitanacaž campiita cjee, Yooz pinsitanacaž irata cjejajo. Tjapa ančuca kamaña zuma cjee. Jalla nekztan Yooz kuz zizñiž cjisnaquiča. Yooz kuzqui zumapanča, nižaza Yooz kuzcama kamzqui Yoozquiz cuntintu cjiskatča, nižaza Yooz kuzcama kamcan ančhucqui zumapan cjequiča.

³ Yoozqui wejr okžcu apóstol puestuquiz wejr utchiča. Jalla nižtiquiztan tjapa ančhucaquiz chiižinuča, persun puntuquiztan anača pinzizqui, “Wejrqui tsjan zumtča” cjicanaqui. Jalla nuž pinziz anaž waquiziča. Antiz zapa mayni persun kamañ puntuquiztan zuma

razunchiz pinziz waquiziĉha. Cjuñzna, Yoozqui zapa maynižquiz tsjii kamaña tjaachiĉha, Yoozquin kuzziz cjitiquiztan jama. Jaziqui ana mitarazi kuzziz cjee.

⁴ Tsjii curpuquiz wacchi partinaca žejlĉha. Punta punta žejlĉha, cherñi, nonzñi, lanzñi jalla nižta.

⁵ Jalla nižta irata Cristuž partiquiz žejlĉha. Uĉumqui tamaž cjen tsjii pariju Cristuž partiquizkaz žejlĉha, tsjii curpužtakazza. Cristuž partiquiz žejlcan, uĉumnacaqui tsjii kuzziz uniru žejlĉha.

⁶ Yoozqui zapa maynižquiz yekja yekja kamaña tjaachiĉha, jaknužt munĉhaja, jalla nuž. Jalla nii tjaata kamañ jaru kama. Yooziž tjaata taku parliñi kamañchižlaj niiqui, jalla nii kamañquiz zuma kama, Yoozquiz tjapa kuzquiztan jama.

⁷ Iclizquiz yanapñi kamañchižlaj niiqui, zuma yanapz waquiziĉha. Yooz puntu tjaajiñi kamañchižlaj niiqui, zumapan tjaajinz waquiziĉha.

⁸ Yoozquin kamzjapa p'ekinchayñi kamañchižlaj niiqui, zumapan p'ekinchayz waquiziĉha. Yoozquin cusasanaca tjaañi kamañchižlaj niiqui, tjapa kuztan tjaaz waquiziĉha. Icliza irpiñi kamañchižlaj niiqui, zumapan irpiz waquiziĉha. T'akjir žoñinacžquin okzñi kamañchižlaj niiqui, zuma cuntintu yanapz waquiziĉha.

ZUMAPAN KAMAQUICHA

⁹ Tjapa kuztan porapat lijitum zuma munaziñi cjee. Ana zuma paaznaca anapan peca. Pero zuma paaznaca tjapa kuztanpan paa.

10 Porapat oksaspanča. Zuma kuztan parti hermanonacžquiz rispitaquiča, anača tsjiž rispitskaz tjewzqui.

11 Ana jayrazñi kuzziz cjee, pero c'unchi kuzziz cjee Yooz sirwizjapa. Nižaza tjapa kuztanpan Yooz sirwa.

12 Arajpach zumanaca tjewžcan, cuntintuž kama. Llaquinacaž tjonanami pasinziz kuzziz kama. Yoozquin parlicanpan žela.

13 Criichi žoñinacaž t'akjiri želan, panž yanapa. Tjonžñinaca tjonan, panž kjawžna.

14 Ančuca quintra žoñinacžtajapa Yoozquiztan mayižinaquiča, ninaca zuma cjisjapa. Anaž quintra chiichiyaquiča. Antiz mayižinaquiča.

15 Cuntintu žejlñi žoñinacžtan cuntintuza cjee. Kaañi žoñinacžtan chicazaž kaazna.

16 Porapat zuma munazican kama. Anača mitarazi kuzziz tucquin cjis pecsqui. Pero humilde kuzziz wirquin cjican cuntintuž cjee. Anača “Wejrqui zuma ziziñ žoñtča” cjee.

17 Tsjiiqui ančuca quintra paachiž cjen, ančucqui anača nižtapacha quintra tjepunzqui. Zumapanž paazjapa tjapa kuz tjaa.

18 Nižaza ančucqui tjapa žoñinacžtan zuma kama, attacama.

19 Pecta jilanaca, cullaquinaca, ančucpacha anača quintra tanassa. Yoozpachaž ančuca quintranaca casticaquiča. Jalla nuž cijirta Yooz takuqui cjiča: “Yooz Jiliriqui tuž cjiča, ‘Wejrtča quintra žoñinaca castiquiñtqui. Wejr castiča’”.

20 Nižaza Yooz takuqui cjiča: “Ančuca quintra žoñinacaž čjjeri eecziž cjen, čjjeri ona. Nižaza

kjaz kjara passiz cjen, kjaz ona. Jalla nuž paažcuqui nii žoñinacžquiz azkataquiča”.

²¹ Tsjii žoñiqui ančuca quintra paasača. Ančuczti ana nižtapacha tjepna. Pero nii quintra žoñžquiz zumžtanž paacan jalla nuž atipa.

13

¹ Tjapa žoñinacaqui gobiernuž mantitanaca caz waquiziča. Yoozqui mantiz poder tjaača tiižquizimi niižquizimi. Yoozqui jilirinacžquiz poder tjaačiča mantizjapa.

² Jalla nižtiquiztan jakziltat jilirž quintra cječhaja, jalla niiqui Yooziž utžta žoñž quintrača. Nižaza nii quintra žoñinacaqui casticta cjequiča.

³ Zuma paañi žoñinacaqui anaž jilirinacžquiz eksnasača. Antiz ana zuma paañi žoñinacaqui jilirinacžquiz eksnasača. ¿Ančuczqui jilirinacžquiz ana ekscan kamz pecya? Zumapan kama. Nekztan nii jilirinacaqui ančucaquiz walikaz cjican cjequiča.

⁴ Jilirinacaqui zizcumi ana zizcumi Yooz sirwiča, ančucalta wali žejlzjapa. Pero ančuczqui ana zuma paaquž niiqui, eksnasača. Jilirinacaqui casticz poderchizza, anača inakaz nii mantiz puestu tanža. Ninacaqui Yooz sirwiča, nižaza Yooz cuntiquiztan ana zuma paañi žoñinaca castičča.

⁵ Jalla nižtiquiztan jilirinacž mantuquiz cjee, Yooz ana casticta cjisjapa, nižaza jilirinacžquiz tjapa kuztan cazpanča.

⁶ Jalla niijapa zakaz ančuczqui impuestonaca pjojkz waquiziča. Mantiñi gobiernuqui Yooz sirwican impuestonaca packatča.

7 Tjapa jilirinacžtan zumapan cjee. Tsjii tasa tjaaslaj niiqui, panž tjaa. Tsjii impuesto pacz waquiziž niiqui, panž paca. Jakziltižquiz rispitz waquiziž niiqui, nižquiz panž rispita. Jakziltižquiz honora waytižinz waquiziž niiqui, nižquiz honora waytižina.

8 Ana jecžtanami kajchiz žela. Pero porapat zuma munaziz waquiziča. Jakziltat žoñinacžtan zuma munazačhaja, jalla niiqui Yooz mantitanacaž cumpliča.

9 Yooz mantita ortinanacaqui tuž cjiča: “Anača adulteriuquiz žejlzqui. Anača žoñi conzqui. Anača tjañi zaazqui. Anača toscara chiizqui. Anača yekja žoñžta cusasa zmazqui”. Jalla nii mantita ortinanacami nižaza tjapa mantitanacami cumplitaž cjequiča, tuž kamcan: “Jaknužta am persun kuztan zuma munazičhaja, jalla nuž žoñinacžtan zuma munaziz waquiziča”.

10 Jakziltat nižta zuma munazičhaja, jalla ni-iqui žoñinacž quintra anapan paaquiča. Jalla nižtiquiztan zuma munazican Yooz mantita ortinanaca cumpliča.

11 Jalla nuž kamcan, tii timpu naya. Nii nii žela. Tuquiqui Jesucristužquiz kuz tjaach-inčhumča. Anziqui ultimu liwriiz tjuñiqui tsjan žcatžinžquiča.

12 Tii kamz timpuqui waj tucuzinžnaquiča. Nižaza Jesucristuž tjonz tjuñi žcatžinžquiča. Jalla nižtiquiztan ana zuma paaz kamañquiztan zarakzpan waquiziča. Zuma paaz kamañchiz kamz waquiziča, tsjii zuma armichiz zultatuztakaz.

13 Zuma kamcan zuma žoñižta ojklaya, kjan-

quiztakaz ojklaycan. Anaž pijjstanaca paacan, kama. Nižaza ana licchi kama. Nižaza ana adulteriuquiz žejlcan kama. Nižaza ana zuma kamañchiz ana kama. Nižaza žoñinacžtan ch'aascan ana kama. Nižaza žoñinacžtan iñisican ana kama.

¹⁴ Tsji zuma armichiz zultatužtakaz Jesucristo Jilirž kuzcama kama. Uj paaz pecni kuz pinsitanacžquiz ana kuz tjaa, nii jaru kamzjapa.

14

CRIICHI ZOÑINACAQUI PUNTA PUNTA PINSQUICHA

¹ Tsji llajlli kuzziz criichi žoñiqui želan, nižquiz zuma risiwaquičha, pero nižtan ana payznakkatni puntunaca ch'aas waquizičha.

² Tsji criichi žoñiqui tantiičha, čhjulumiz lulasachha, nii. Yekja criichi žoñiqui tantiičha, chjizwi ana lulasachha, nii.

³ Nii čhjulumi lujlñi žoñiqui nii yekja žoñžquiz ana iñarž waquizičha. Nižaza nii ana chjizwi lujlñi žoñiqui nii čhjulumi lujlñi žoñžquiz anaž uj tjojtunz waquizičha. Yoozqui nii čhjulumi lujlñiqui risiwchičha, nižquiz kuzziz cjen.

⁴ Jalla nižtiquiztan nii Yooz sirwiñi žoñžquiz ana uj tjojtunz waquizičha. Niiž persun Yooz Patrunaqui niž uj jwesnaquičha, ana zuma paachižlaj niiqui. Yoozquiz kuzziz cjenaqui ultimquiziqui walikaz cjesachha. Yooz Patrunaqui nii žoñžquiz wali cjiskatz atčha niž aztanaqui.

⁵ Tsji puntužtan chižinučha. Tsji criichi žoñiqui “Tsji tjuñinacaqui chawc tjuñinacačha” cjičha. Yekja criichi žoñizti cjičha, “Tsji parijučha tjuñinacaqui”. Zapa mayni persun kuzquiz

zumpacha tantiižcuqui, jalla nii tantiita jaru kama.

⁶ Tsjii criichi zoñiqui tsjii chawc tjuñi wartaquiž niiqui, Yooz honora waytita cjisjapa wartiyaquiča. Tsjii criichi zoñizti nii tjuñi ana wartčhaja, jalla niiqui Yooz honora waytita cjisjapa nižta ana wartča. Nižaza tsjii čhjulumi lujlñi zoñiqui Yoozquin gracias cjižcu jalla nuž lulaquiž niiqui, Yooz honora waytita cjisjapa lulaquiča. Nižaza yekja criichi zoñiqui ana chjizwi lulaquiž niiqui, Yooz honora waytita cjisjapa ana lujlča. Nižaza ana lujlchiž cjen niiqui Yoozquin gracias cjican chiiz waquiziča.

⁷ Anaž zoñinacaqui inakaz kamča, nižaza anaž inakaz ticža.

⁸ Učhumqui tii muntuquiz kamcan Yooz Jiliržtajapapanž kamča. Nižaza ticzcan Yooz Jiliržtajapapanž ticža. Jalla nižtiquiztan žejtcanami ticzcanami Yooz Jiliržtajapapančhumča.

⁹ Jalla nijapa Jesucristuqui ticziča, nižaza jacaatčiča, žejtñi zoñžtami, ticzi zoñžtami tjapa zoñinacžta Jiliri cjisjapa.

¹⁰ Jalla nižtiquiztan ¿kjažtiquiztan am criichi jilžquiz uj tjojtunjo? Nižaza ¿kjažtiquiztan am jilž quintra iñarjo? Tjapa učhumqui Yooz yujcquiz prisintistanča, niž pjalžtaž cjisjapa.

¹¹ Cjijrta Yooz takuqui tuž cjiča:

“Yoozqui ultimupanž cjiča, ‘Wejt yujcquiz zapa mayni zoñiqui quillznaquiča. Nižaza zapa mayniqui wejtquin rispitaquiča; nižaza wejt honora chiyaquiča’”.

12 Jalla nižtiquiztan tjapa učhumqui Yoozqui quinta tjaastanča.

UJQUIZ ANA TJOJTSKATA

13 Jalla nižtiquiztan učhumqui porapat ana iya ujnaca tjojtনারas waquiziča. Pero tjapa učhumqui tuž tantiiz waquiziča, yekja jilžquiz anapanž ujquiz tjojtskatz munzqui.

14 Chjul cusasami tsjii criichi žoňžquiz ana ujchiz cjiskatasacha. Jalla nii razuna zizuča, Jesucristo Jiliržquiz kuzziz cjen. Jalla niic nužupanča. Jakziltat “Tii cusasaqui ujchiz cjiskatča” cjan tantiyačhaja, jalla nižquiz nii cusasaqui ujchiz cjiskatasacha.

15 Ančuca lujltiquiztan tsjii criichi žoňž kuz payznakaquž niiqui, nii čheriqui anaž lujlz waquiziča. Jalla nii čheri tira lulaquž niiqui, amqui nii payznakskatni žoňžtan ana zuma munaziča. Yekja criichi žoňžquiz ana ujquiz tjojtskata, castica cjejajo. Jesucristuqui nižtajapa zakaz ticziča.

16 Tsjii žoňžtaqui čjulu lujlzmi walikaz cjesacha. Pero nii lujltaž cjen parti žoňinacaqui, “Ana zuma kamañchizza nii criichi žoňiqui” cječhaj niiqui, nekztan ana lujlz waquiziča.

17 Yooz mantuquiz kamcan, čherimi liczmi ana importiča. Pero Espiritu Santuž cjen ana ujchiz cjee; nižaza Yooztan ančucatan walikaz cjee; nižaza cuntintu kuzziz cjee. Jalla nužuča chekan zuma kamañaqu.

18 Jakziltat jalla nuž kamcan Cristužquiz sirwačhaja, jalla niž cjen Yoozqui cuntintuž

cjequiča. Nižaza parti žoñinacaqui “Nii žoñiqui walikaz kamča” cjican chiyaquiča.

¹⁹ Učhumnacžtan parti žoñinacžtan zumapanž kamzjapa kuz tjaa. Nižaza parti criichinacžquiz juc'ant zuma kamañchiz cjeajajo, jalla nii kamzquiz kuz tjaa.

²⁰ Ančhucaž čhjulumi lujltiquiztan anača yekja criichi žoñžquiz Yooz zuma kamañquiztan jaytiskatzqui. Ana čhjul čhjerimi ujchiz cjiskatasacha. Pero nuž čhjulumi lujlžcu yekja criichi žoñžquiz ujquiz tjojtskataquiž niiqui, jalla nižtiquiztan anaž čhjulumi lujlz waquiziča.

²¹ Tsjii criichi žoñiqui ančhucaž chjizwi lujltiquiztan, nižaza vinu lictiquiztan, nižaza čhjulumi paatiquiztan ujquiz tjojtskatasazaž niiqui, jalla nižtanaca paazqui ana waquiziča.

²² Jesucristužquiz tjapa kuzziz cjen čhulu kamañchizlaja, jalla nii kamañ jaru Yooz yujcquiz kamz waquiziča. Yoozquizkaz quinta tjaastanča. Jalla nuž zuma kamcan persun kuzquiz uj ana sint'aquiča. Persun kuzquiz ana zinta uj sint'ican zuma kamaquiž niiqui cuntintuž cjequiča.

²³ Pero jakziltat paysnakñi kuztan lujlčhaja, jalla nii paysnakžcu lujltiquiztan persun kuzquiz uj sint'aquiča, “Ujžcaa nii lujlzqui” cjican. Yoozquin ana tjapa kuztanžlaj niiqui, čhjulumi ujž cjesača. Yoozquin kuzzizpan cjee.

15

PORAPAT YANAPARASQUICHA

1 Yekjap uĉhumqui tjapa kuztanpan Yoozquinĉha. Yekjapanacaqui Yooztan kamcan llajlla kuzzizza. Uĉhum kuzquiz pecta jarukaz anaž kamz waquiziĉha. Nii llajlla kuzziz criichi zoñinacaž pinsitanaca panž cjuñzna, zuma kami yanapajo.

2 Zapa mayni criichi zoñiqui parti criichi zoñinacztajapa kamz waquiziĉha, ninaca tsjan zuma kamañchiz cjisjapa.

3 Jesucristuqui nižta kamchiĉha, anaĉha persun kuz wali cjisjapa kamchiqui. Cjijrta Yooz takuqui Jesucristuž puntuquiztan tuž cjiĉha: “Yooz quintra iñarñi zoñinacaqui wejt quintra iñarĉiĉha”.

4 Yooz takuqui uĉhumnacalta cjiirtkalĉha, uĉhumnacaquiz tjaajinzjapa. Jalla tuž uĉhumnacaquiz tjaajinĉha, zuma tjurt'iñi kuztan, pasinsis kuztan, nižaza p'ekinchayta kuztan, Yoozquin arajpachquin ojkz tjewzjapa.

5 Yoozqui uĉhumnacztan pasinsis kuzzizza; nižaza uĉhumnacaquiz p'ekinchayĉha. Nii Yoozpacha uĉhumnacaquiz yanapt'ila, tsjii kuzziz cjeyajo, nižaza zuma kamajo Jesucristuž munañpacama.

6 Jalla nuž tsjii kuzziz kamcan, uĉhumqui tsjii kuzziz Yooz honora waytaquiĉha. Yoozqui uĉhum Jesucristo Jilirž Ejpĉha. Jalla niž honora waytaquiĉha.

CRISTUZ PUNTU

7 Jalla nižtiquiztan tsjiimi tsjiimi zumaž risiwžcu munazaquiĉha, jaknužt Cristuqui uĉhumnacatan zuma munaziĉhaja, jalla nuž, Yooz honora waytita cjisjapa.

8 Ančhucaquiz cjiwčha. Jesucristuqui judío žoñinaca liwrii nižaza yanapñi tjonchiča. Nuž tjontiquiztan Yooz niž taku lijituma cumpliñipan, jalla nii tjeeziča. Yoozqui tuquitanpacha judío žoñinacž atchi ejpnacžquiz taku tjaachiča. Jalla nii taku cumplichiča, Jesucristuž tjonchiž cjen.

9 Nižaza Jesucristuqui tjonchiča, yekja wajtchiz žoñinacžquiz Yooz honora waytiskatzjapa. Yooz ancha okzñi kuzziz cjen niž honora waytitača. Jalla nužupan cijjrta Yooz takuqui chiiča, tuž cjan:

“Jalla nižtiquiztan wejrqui yekja nacionchiz žoñinacžtan žejlcan, am honora waytača. Nižaza am honora waytican, itsnača”.

10 Yooz tawk liwruquiz tuž cijrtazakazza:

“Yekja nacionchiz žoñinaca, Yooz parti žoñinacžtan chica cuntintuž cjee”.

11 Yooz tawk liwruquiz tuž cijrtazakazza:

“Yekja nacionchiz žoñinaca, tjapa ančhucqui Yooz Jilirž honora wayta. Tjapa žoñinacaqui Yooz zuma paatanacquiztan nižquin honora tjaala”.

12 Nižaza Yooz tawk liwruquiz Isaiasqui tuž cijjrchiča:

“Isaiž majchmaatinacquiztan tsjiiqui tjonaquiča. Jalla nii tjonžcu yekja nacionchiz žoñinacaž mantaquiča. Nižaza niž cjen ninacaqui liwriiñiž tjewznaquiča”.

13 Yoozza liwriiñi tjewzkatñiqui. Nii Yoozqui ančhuca kuz ancha cuntintu cjiskatla. Nižaza Jesucristužquiz kuzziz cjen walikaz cjiskatla.

Nekztan ančhucqui Yooz Espíritu Santuž aztan zumpacha liwriiñiž ancha tjewznasača.

14 Wejt jilanaca, cullaquinaca, ančhucqui ancha zuma kamañchizza, nižaza Yooz puntu zuma zizza, nižaza tsjiižquizimi tsjiižquizimi Yooz puntu zuma intintiskatča. Jalla nužupanča ančuca kuzqui. Jalla niiqui zumpachal zizuča.

15 Jalla nuž cjenami ana jiwjatžcu tsjii kjaž puntunaca cjijržcuča, ančucaquiz cjuñkatzjapa. Yoozqui wejtquiz favora paacan apóstol puestuquiz utčiča, tii puestuquiz Jesucristo sirwizjapa. Jalla nižtiquiztan ančucaquiz cjijržcuča.

16 Jesucristo sirwican, yekja wajtchiz žoñinaczquiz liwriiñi Yooz taku paljayuča. Jalla nuž Yooztajapa langznuča, nii yekja wajtchiz žoñinaca Yoozquin kuz tjaajo. Ninaca tsjii zuma ofrendažtakaz Yoozquiz prisintis pecuča. Nižaza Espíritu Santuž ninaczquiz zuma kamañchiz cjiskatchiž cjen, Yoozqui ninaczquiztan cuntintuž cjequiča.

17 Jesucristo sirwican wejt Yooztajapa langžtiquiztan cuntintuča wejrqui, tama žoñinaca nižžquin kuz tjaachiž cjen.

18 Jesucristuž puntuquiztankaz wejrqui chiiz pecuča. Jesucristuqui wejtquiz wacchi zuma obranaca paakatchiča, yekja wajtchiz žoñinaca nižžquin kuz tjaakatjapa. Jesucristuž cjen, wejrqui milajru paatanacami Yooz puntu chiitanacami nii yekja wajtchiz žoñinaca Yooz kuzcama cazkatchinča.

19 Espíritu Santuž aztan ninaca cazkatchinča wacchi milajrunaca paacan. Jalla nuž paacan, nižaza tjapa Jesucristuž puntuquiztan parlican,

wejrqui tjapa kjutñi ojklaychinča, Jerusalenquiztan Ilírico yokaran.

²⁰ Wejrqui kuzquiz tantiichinča, jakziquin Yooz puntu parlitažlaja, jalla nicju ana ojkz pecchinča. Pero jakziquin Jesucristuž puntu ana parlitažlaja, jalla nicjuñ liwriiñi Jesucristuž puntuquiztan parlican ojklayača, yekja žoñž iclizanaca ana mitiscu.

²¹ Cjijrta Yooz takuqui tuž cjiča:

“Tuquiqui Yooz puntu ana nonziča. Jaziqui nii žoñinacaqui Yooz puntu nonžcu catokaquiča. Nižaza ninacaqui Yooz puntu intintazaquiča”.

PABLUQUI ROMA CJITA WAJTQUIN OJKZ PECCHA

²² Jalla nuž ojklaycan wejrqui ančhucaquiz ana tjonzñi atchinča. Walja tjonz pecaytuča, pero anal atchinča.

²³ Ažk watanacquiztanpacha wejrqui ančhucatan zalz pecaytuča. Anziqui tii yokaran ojklayzqui žerzinča.

²⁴ Jalla nižtiquiztan ančhucaquin ojkz cjisnuča; España ojkan tjonznača. Tsjii kjaž maj ančhucatan cuntintu kaman, ančhucqui wejr yanapasača, wilta jiczquiz ojkszjapa España irantajo.

²⁵ Pero anzpacha wejrqui Jerusalén watja okača, ofrendanaca chjichača nicju žejlñi criichinaca yanapzjapa.

²⁶ Macedonia wajtchiz žoñinacami Acaya wajtchiz žoñinacami kazziča ofrendanaca utzjapa, Jerusalén pori criichinaczquiz yanapzjapa.

27 Jalla nuž ofrendanaca tjaaz puntuquiztan ninacapachača “Waliča niiqui” cjichi qui. Nižaza ninacaqui judío žoñinacžquiz kajažtakazza. Judío žoñinacaqui ninacžquiz Yooz zuma tjaajintanaca tojunchičha, ninaca liwriita cjisjapa. Jalla nižtiquiztan nii yekja wajtchiz žoñinacaqui judío wajtchiz žoñinacžquiz ninacž cusasanaca tojunz waquiziča.

28 Primiraqui tii ojkz cumplistanča ofrendanaca intirjizjapa. Jalla nuž ojктаžu ančucaquiz tjonznača, España ojkcان.

29 Nekztan liwriiñi Jesucristuž puntuquiztan zumpacha ančucatan parliz pecučha. Jalla nekztanaqui Jesucristuž cjen wejtquizimi ančucaquizimi wali cjequiča. Nužupanž cjequiča.

30 Jilanaca, cullaquinaca, ančucaquiz rocuča učum Jesucristo jiliriž cjen, nižaza munaziñi kuz cjiskatñi Espíritu Santuž cjen, oracionžtan yanapalla. Wejrqui ancha Yoozquiztan mayučha,

31 Judea wajtchiz quintru žoñinacžquiztan anapan tanta cjisjapa. Nižaza oracionžtan yanapalla, tii weriž chjitžta ofrendanaca wali risiwta cjisjapa. Pecučha, judío criichi žoñinacaqui tii ofrendanaca zuma risiwčhaja, nii.

32 Jalla nuž zuma wataquiž niiqui, ančucaquin tjonžcača Yooz munan. Wejr cuntintu iran-tižquizjapa, mayižinaquiča. Nižaza ančucatan tjonžcu porapat cuntintu kuzziz yanaparasjapa mayižinaquiča. Jalla nijapa oracionžtan yanapalla.

33 Yoozqui ančuc walikaj cjiskatla. Jalla nužoj cjila. Amén.

16

PABLUZ TSAANTANACA

¹ Tsjaa criichi cullaquiqui žejlča, Febe cjiti, jalla naa cullaquiqui ancha zumča cjiwča. Naaqui Cencrea iclizquiz Yooztajapa sirwiča.

² Yooz Jiliriž cjen naa cullaqui zuma risi-waquiča. Jalla nuž waquiziča Jesucristužquiz kuzziz jilanacaqui. Jalla naa cullacaquiz yanapaquiča čhjulu pecanami. Naaqui wacchi criichi žoñinacžquiz yanapchinča, nižaza wejtquizimi.

³ Priscilaquizimi Aquilžquizimi tsaanžinalla. Ninacaqui Jesucristužquin sirwiñi mazinacača.

⁴ Wejr ticznawc cjen ninacaqui wejr liwri-iskatchičha. Jalla nuž liwriiskatcan ninacaqui joz ticzizakazza. Jalla nižtiquiztan ninacaž cjen Yoozquin gracias cjican chiyučha. Nižaza tjapa nacjuñta jilanacaqui ninacaž cjen Yoozquin gracias cjiča.

⁵ Nižaza Priscila Aquilž kjuyquiz ajczñi jilanacžquiz tsaanžinaquiča. Nižaza weriž pecta Epeneto tsaanžinaquiča. Acaya wajtchiz žoñinacžquiztan primirpacha niiqui Cristužquin kuz tjaachiča.

⁶ Nižaza Mariaquiz tsaanžinaquiča. Naaqui ančhucatan žejlcan ancha langzinča.

⁷ Nižaza wejt wajtchiz žoñinacžquiz, Andrónico, nižaza Junias, tsaanžinaquiča. Ninacaqui wejttan chica carsilquiz žejlchi compañerunacatača. Apostolunacazakaz ninaca rispitcha. Weriž ima Jesucristužquiz kuz tjaan, ninacaqui Jesucristužquiz kuz tjaachiča.

⁸ Nižaza Ampliasquiz tsaanžinaquiča. Jalla niičha weriž pecta maziqiu. Niiqui Jesucristo Jiliržquin kuz tjaachizakazza.

⁹ Nižaza Urbanžquiz tsaanžinaquiča. Niiqui Jesucristužquiz sirwiñi maziča. Nižaza weriž pecta Estaquiz tsaanžinaquiča.

¹⁰ Nižaza Apelesquiz tsaanžinaquiča. Jalla niiqui Jesucristužquiz kuz tjaažcu, Yooz kamaña pankaz kamča. Nižaza Aristóbuluž kjuychiz žoñinacžquiz tsaanžinaquiča.

¹¹ Wejt wajtchiz žoñžquiz, Herodión, tsaanžinaquiča. Nižaza Narcisož kjuychiz Yoozquin criichi žoñinacžquiz tsaanžinaquiča.

¹² Nižaza Trifenaquiz, nižaza Trifosaquiz tsaanžinaquiča. Ninacaqui Yooz Jiliržtajapa sirwiča. Nižaza učum pecta Persidaquiz tsaanžinaquiča. Naaqui Jesucristo Jiliržtajapa juc'anti langzinča.

¹³ Nižaza Rufžquiz tsaanžinaquiča. Niiqui Jesucristužquiz tjapa kuz tjaažcu, parti hermanonacžquiz rispitta cjissiča. Nižaza niž maaquiz tsaanžinaquiča. Naaqui wejt maa cuntitača.

¹⁴ Nižaza tsaanžinaquiča tinacžquiz, Asincritužquiz, Flegontižquiz, Hermasquiz, Patrobasquiz, Hermesquiz, nižaza ninacžtan chica kamñi jilanacžquiz.

¹⁵ Nižaza tsaanžinaquiča Filologužquiz, nižaza Juliaquiz, nižaza Nereožquiz, nižaza niž cullacaquiz, nižaza Olimpasquiz, nižaza tjapa ninacžtan kamñi criichi žoñinacžquiz.

¹⁶ Nižaza porapat zuma tsaanassaquiča, tjapa kuztan. Nižaza tjapa Jesucristužquiz kuz tjaañi

žoňinacaqui ančhucaquiz tsaanz apayžquiča.

¹⁷ Jilanaca, cullaquinaca, ančhucaquiz rocuča, zumapanž ančhucqui cwitazaquiča, nii t'akt'aksňi žoňinaczquiztan. Nižaza zumpacha cwitazaquiča tsjii kjutňi tjaajiňi žoňinaczquiztan. Nii žoňinacaqui, jaknužt ančhucaquiz Yooz puntu tjaajinta cječhaja, jalla nii tjaajinta quintra tjaajinča. Ninaczquiztan ančhucqui zaraka.

¹⁸ Ninacaqui Jesucristužtajapa ultimu ana sirwiča. Antiz ninacaqui persun kuzcamaž sirwiča. Ninacaqui humilde criichinaczquiz in-callča, zuma chiican, žoňinacz kuz wali cjsjapa.

¹⁹ Tjapa žoňinacaqui ančuca puntu zizza, jaknužt ančhucqui Yoozquin cazzaja, jalla nii. Jalla nižtiquiztan wejrqui chipznuča. Nižaza zumanaca paazjapa zizňi zizňi cjee. Ana zumanaca paachucaž cjen, ana mitisa.

²⁰ Jalla nuž zuma kaman, Yoozqui ančhucaltajapa Satanás diabluzquiz tjeczcu, atipaquiča. Yoozza ančhuc walikaz cjiskatňi. Nižaza učhum Jesucristo Jiliriqui ančhucaquiz yanapt'ila. Amén.

²¹ Timoteuqui ančhucaquin tsaanz apayžquiča. Niiqui wejt compañeruča, wejr Yooztajapa langznan. Nižaza wejt wajtchiz žoňinaca, Lucio, Jasón, Sosípater, jalla ninacaqui ančhucaquin tsaanz zakaz apayžquiča.

²² Nižaza wejrqui, Tercio cjita žoňtča ančhucaquin tsaanz zakaz apayžcuča, Jesucristo Jilirž tjuuquiz. Wejrqui Pabluž chiitiquiztan tii cartal cijjruča.

²³ Nižaza Gayuqui ančhucaquin tsaanz apayžquiča. Niiž kjuyquiz alujassinča. Nižaza

niiqui čhjul criichi žoñimi kjawzñipanikazza, niž kjuyquiz alujazjapa. Nižaza Erastuqui ančhucaquin tsaanz apayžquiča. Jalla niiča wajt paaz tanzñi tesoreruqui. Nižaza učhum jila Cuarto cjitaqui ančhucaquin zakaz tsaanz apayžquiča.

²⁴ Učhum Jesucristo Jiliriqi tjapa ančhucaquiz zumaj yanapt'ila. Jalla nužoj cjila. Amén.

ZERZ TAKUNACA

²⁵ Ima žerzcan Yooz honora waytuča. Yoozqui ančhuc tjurt'iñi kuzziz cjisnasača. Nii liwriiñi Yooz puntumi, Jesucristuž puntumi parluča. Jalla nii parlita puntunacaqui Yoozqui ančhucaquiz zizkatchiča. Tuquitan nii puntunaca ana ziztača.

²⁶ Tii timpuquizkaz Yoozqui nii puntunaca zizkatchiča. Nižaza profetanacaqui nii puntunaca cjiirchiča Yooz tawk liwruquiz. Tii timpuquiz wiñay žejtñi Yoozqui mantichiča, tjapa žoñinacžquiz nii puntunaca zizajo. Jalla nuž mantichiča, žoñinaca Jesucristužquiz kuz tjajjo, nižaza casajo.

²⁷ Yoozkazza zizñi zizñiqui. Jesucristuž cjen Yooz honoraqui wiñaya waytitaj cjila. Jalla nužoj cjila. Amén.

Ew Testamento: Chipay Tawkquiztan New Testament in Chipaya (BL:cap:Chipaya)

copyright © 2009 Wycliffe Bible Translators, Inc.

Language: Chipaya

Translation by: Wycliffe Bible Translators, Inc.

Chipaya [cap], Bolivia

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chipaya

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files
dated 29 Jan 2022

baeaa6d6-fcc1-578f-afbd-04a9c5c14184